

Yesus - Kaili Da'a

MARKUS

Tesa nompakanoto isi buku

Buku e'i nitulisi samba'a tau to Yahudi to nosanga ka i Markus. I'a nantuki Petrus, anaguru i Pue Yesus riaru mpolumakona nanggeni Kareba Belo. Tesa-tesa to niepe Markus nggari ja'i Petrus, etumo to nitulisina riaru bukuna e'i. Buku e'i nitulisi Markus ka tau-tau da'a to Yahudi ala ira wo'u mamala mangginjani Kareba Belo nggari ja'i Alatala.

Isi buku e'i nantesu powia i Pue Yesus bo pepatudukina ka topantuki I'a. Yesus nompatolele Kareba Belo to nanguli Pue Alatala nompamula noparenta ewa magau ri dunia e'i (1:14-15). Yesus nakuasa nompakabelo tau-tau naju'a pade nompopalai seta-seta nggari ja'i ntau to nipesua seta. Tapi naupa iwetu topanggeniaka-topanggeniaka nto Yahudi nangewa Yesus, pade kaopuna ira nasintuwu mompatesi I'a (3:6). Tapi Yesus da'a nalai nggari ja'i ira. Kakonona I'a mboto nombaboto ira kana mompatesi I'a (8:31; 9:31; 10:33-34). I'a nompakatantu kana malau mpaka ri ngata Yerusalem sabana patuju karatana ri dunia ala mombawai korona rapatesi mantolo silaka manusia (10:45). Naopu Yesus nipatesi I'a natuwu bali pade neore mpaka ri suruga.

Patuju Markus to napokona nantulisi bukuna e'i ala mompakanoto Yesus Magau to Mompakasalama bo Ana nu Alatala mboto (kitamo 1:1, 11, 24; 3:11; 5:7; 8:29; 9:7; 14:61-62; 15:39).

Isi buku to napokona iwe'i:

1. Pamulana bago Yesus (1:1-13)
2. Yesus nompamula nompatuduki todea pade nompokita kuasana ri Bagia Galilea (1:14-3:6)
3. Yesus nompapola bagona ri Bagia Galilea (3:7-6:13)
4. Bago Yesus ri sawaliku Bagia Galilea (6:14-8:30)
5. Polumako Yesus mpaka ri ngata Yerusalem (8:31-10:52)
6. Powia bo pepatuduki Yesus ri ngata Yerusalem (11:1-13:37)
7. Yesus nisoko pade nipatesi (14:1-15:47)
8. Yesus natuwu bali (16:1-20)

1

Yohanes Topediu nompakasadia tau dea mantarima Yesus Kristus
Mat. 3:1-12; Luk. 3:3-6, 15-17; Yoh. 1:19-28

1 Tesa e'imo pamulana Kareba Belo to nombatesa Yesus Kristus, Ana nu Alatala.

2 Naria tesa Alatala to nitulisi nabi Yesaya nggaolu iwe'i:
«Kita we'i! Aku nompakau batuaku mokolu nggari ja'imu
ala i'a mompakasadia jala ka Komi.
(Mal. 3:1)

3 Naria samba'a tau nongare-ngare ri karawa baina iwe'i:
<Pakasadiamo jala ka i Pue!
Pakanoa jala to ratukina!> »
(Yes. 40:3)

4 Ewa to nitulisi etu iwetu wo'u Yohanes Topediu neumba ri karawa baina. I'a nompatuduki tau dea iwe'i: «Kajeamo komi nggari pokainggumu to naja'ana. Pade komi kana radiu ala silaka-silakamu raampungu nu Alatala.»

5 Pade naratamo tau-tau ri ja'ina nggari njumaongu Bagia Yudea bo pura-pura pue ngata Yerusalem. Ira pura-pura nompangaku silaka-silaka ira pade nidu Yohanes ri Binangga Yordan ewa tandaina najeamo ira nggari silaka ira etu.

6 Pakea Yohanes nikawia nggari wulu nu unta pade sulepena nikawia nggari kulimba, pade panggonina nggaboro bo ue wani.

7 I'a nompatolele tesa ka tau dea iwe'i: «Damariapa ngena to maratana nggari puriku to neliu nggakuasa nggari aku. Nau aga motungga mombawole lui sapatuna aku e'i da'a ntoto masipato.

8 Aku e'i nombadiu komi ante ue ewa tandaina najeamo komi nggari silakamu. Tapi I'a kana mombadiu komi ante Nosa Nagasa nu Alatala.»

Yesus nidiu Yohanes ri Binangga Yordan

Mat. 3:13-17; Luk 3:21-22

9 Tempo etu naratamo Yesus nggari ngata Nazaret ri Bagia Galilea, pade I'a nidiu Yohanes ri Binangga Yordan.

10 Iwetu Yesus nesore nggari ue nikitana langi natebea pade Nosa Nagasa nu Alatala nana'u ri ja'ina ewa samba'a tonji banggebodo.

11 Pade naria suara nggari suruga nanguli, «Ikomo Anaku to nipotoweku. Ikomo to nikonoa raraku.»

Yesus nipesoba Magau nu Seta

Mat. 4:1-11; Luk. 4:1-13

12 Naopu etu kaliu-liu Nosa Nagasa nu Alatala nanggeni Yesus mpaka ri karawa baina.

13 Pade Yesus neto'o ri setu patampulu mbengi kasaena nipesoba Magau nu Seta. I'a nosangani-nggani ante binata-binata naila ri setu, pade malaeka-malaeka i Pue narata nantulungi I'a.

Yesus nompokio patamba'a topompemala bau mantuki I'a

Mat. 4:12-22; Luk. 4:14-15, 5:1-11

14 Naliu Yohanes Topediu nitarunggu, nalaumo Yesus mpaka ri Bagia Galilea nompatolele Kareba Belo nggari ja'i Alatala.

15 Niulina, «Naratamo tempona to nipakatantu Alatala. Namosumo tempona Alatala moparenta ri dunia e'i ewa magau. Kajeamo komi nggari pokainggu komi to naja'ana, pade parasayamo Kareba Belo nggari ja'i Alatala!»

16 Tempona Yesus nolumako ri wiwi Rano Galilea I'a nanggita i Simon ante tua'ina Andreas. Tempo etu ira nantendeaka jala nompemala bau ri rano etu sabana ira topompemala bau.

17 Nangulimo Yesus ka ira, «Kamaimo, tukimo Aku, pade Aku mompatuduki komi mangelo tau majadi topantuki Alatala.»

18 Nangepe tesa etu kaliu-liu ira romba'a nompalasi jala ira ri setu pade nalau nantuki Yesus.

19 Naopu etu Yesus nompapola polumakona sakedi pade nikitana Yakobus, ana i Zebedeus, bo tua'ina Yohanes riar saongu sakaya nompakabelo jala ira.

20 Iwetu Yesus nanggita ira nangulimo I'a ka ira, «Kamaimo, tukimo Aku.» Nangepe etu ira romba'a nompalasi uma ira riar sakaya nosangani-nggani ante tau-tau to nigajina, pade nalaumo ira nantuki Yesus.

Yesus nompopalai seta nggari ja'i ntau to nipesua seta

Luk. 4:31-37

21 Naopu etu naratamo Yesus ante topantuki-topantuki I'a ri ngata Kapernaum. Pade ri Eo Mpenonto nesuamo I'a ri sapo mpodade nto Yahudi pade nopaguru ri setu.

22 Nasumara mpu'u tau-tau to nangepe pepatudukina sabana akalana nopaguru nakuasa mpu'u, da'a ewa guru-guru agama.

23 Tempo etu riar sapo mpodade etu naria samba'a tau to nipesua seta. Sampegoli nongaremo i'a ante suara namangga,

24 «E, Yesus to Nazaret! Nuapa madota mupowia ka kami? Komi narata mompakaropu kami? Ninjaniku isema Komi. Komimo to Nagasana nggari ja'i Alatala!»

25 Tapi Yesus nanggarau seta etu, «Pekalino! Palaimo nggari ja'i ntau etu!»

26 Nangepe etu seta etu nombagoyaya-goyaya mpakagai tau etu pade nesuwumo i'a nggari ja'i ntau etu ante nongare-ngare.

27 Nanggita etu nasumara puramo tau ri setu sampe ira nosimpekutana samba'a bo samba'a, «Hai! Nuapa e'i? Sangele pepatuduki to nabouna. Ante kuasana I'a nomparenta seta-seta malai pade seta-seta etu natundu nantuki parentana!»

28 Naopu etu nasalisa natolele kareba ewa Yesus sampe ri njumaongu Bagia Galilea.

Nadea tau naju'a nipakabelo Yesus

Mat. 8:14-17; Luk. 4:38-41

29 Sangga nesuwupa nggari sapo mpodade etu nalaumo Yesus mpasangani-nggani ante Yakobus bo Yohanes mpaka ri sapo i Simon bo Andreas.

30 Riara njapo etu matu'a besi i Simon naturu ri paturuna sabana naju'a pane. Iwetu Yesus nesua rara njapo notesamo tau ri setu ka I'a, «Guru, naju'a we'i matu'a besi i Simon.»

31 Jadi nalaumo Yesus nompakamosu besi etu. Nisokona palena pade nitulungina besi etu nembangu. Kaliu-liu nabelomo ju'ana, pade nompamulamo i'a nangala panggoni nikenina ka ira.

32 Ulungguwia etu tempo nasolomo eo, naratamo tau dea nanggeni roa-roa ira to naju'a bo tau-tau nipesua seta mpaka ri ja'i Yesus.

33 Pura-pura pue ngata etu nasiromu ri ngayo sapo to nipeto'o Yesus etu.

34 Pade Yesus nompakabelo nadea tau to nawela mpengele-ngele ju'a, pade nadea seta nipopalaina nggari ja'i ntau dea. Da'a nipalogana seta-seta etu notesa sabana ninjani ira isema I'a.

Yesus nalau nopaguru ri ngata-ngata ntanina ri Bagia Galilea

Luk. 4:42-44

35 Dakampadondo njiina kaeona etu nembangumo Yesus nompalasi sapo etu. Pade nalaimo I'a mpaka ri saongu peto'o to nakalinoana pade nosambaya ri setu.

36 Simon bo roa-roana nalau nangelo I'a.

37 Sangga nirata irapa Yesus, nangulimo ira ka I'a, «Guru, pura-pura tau nangelo Komi.»

38 Nangulimo Yesus ka ira, «Kamaimo kita mompapola polumakota mpaka ri ngata-ngata ntanina ala Aku mamala mompatolele Kareba Belo ka tau-tau ri setu wo'u, sabana etumo patuju karataku e'i.»

39 Jadi nalaumo I'a nompatolele Kareba Belo ri sapo-sapo mpodade ri njumaongu Bagia Galilea. Pade I'a wo'u nompopalai seta-seta nggari ja'i tau-tau to nipesua seta.

Yesus nompakabelo samba'a tau naju'a bete

Mat. 8:1-4; Luk. 5:12-16

40 Naopu etu naratamo samba'a tau to naju'a bete mpaka ri ja'i Yesus. Nekadedemo i'a ri ngayona pade nerapi ante mpu'u-mpu'u, «Pue, ane Komi madota, Komi mamala mompakabelo ju'aku e'i.»

41 Nanggita tau etu naasi mpu'umo mata Yesus. I'a nangojo palena nanjoko koro ntau etu, pade niulina ka i'a, «Aku madota. Kabelomo ju'amu!»

42 Kaliu-liu nalinomo ju'a ntau etu pade nabelo balimo korona.

43 Pade Yesus nompakau i'a nalai ante nompopatora i'a iwe'i:

44 «Tora-tora, ne'e mutesa ka isema-sema nuapa to najadi ri koromu. Tapi kalaumo komi mompopokita koromu ka topanggeni agama ala rakitana nabelomo ju'amu. Pade waimo pesomba ka Alatala ewa to niparenta i Musa ala mompopokita ka tau pura-pura nabelomo ju'amu.»

45 Tapi nalaumo tau etu nompatolele kajadia etu ka tau-tau ri umba-umba sampe Yesus mana namala mesua nggamata-mata riara ngata. I'a aga neto'o ri sawaliku ngata ri peto'o nakalinoana. Tapi naupa iwetu tau dea danarata ri ja'ina nggari umba-umba ngata.

2

Yesus nompakabelo samba'a topunggu

Mat. 9:1-8; Luk. 5:17-26

1 Bara sakuya mbengi kaliuna nesua wo'umo Yesus ri ngata Kapernaum. Pade natolelema tesa to nanguli Yesus naria rara njapona.

2 Nangepe etu nadea mpu'umo tau narata nasiromu ri sapo etu sampe mana nasuka, nau aga ri ngayo pewobo mana ria peto'o. Ri setu Yesus nempatolele Tesa nu Alatala ka ira.

3 Tempona I'a danotesa naratamo patamba'a tau nombakowa roa ira to napungguna.

4 Ira da'a namala nompakamosu Yesus sabana tau-tau ri setu neliu nggadea. Jadi nalaumo ira nepone ri bunggu ata nu sapo etu,¹ pade nibongga ira ata ri ntoto Yesus. Sangga natebukapa ata etu niulunjaka iramo topunggu etu ante ompa paturuna.

5 Tempo Yesus nanggita karoso pomparasaya ira etu, nangulimo I'a ka topunggu etu, «Anaku, silaka-silakamu niampungimo.»

6 Nangepe etu nompamulamo bara sakuya mba'a guru agama to nekatoko ri setu nompekiri riaru nta'i ira,

7 «Nokuya tau e'i notesa iwetu? I'a nompakakedi Alatala! Da'a ria samba'a manusia namala mombaampungi silaka, aga Alatala mboto!»

8 Tapi Yesus nangginjani nuapa to nipekiri ira. Etu sampe I'a nanguli ka ira, «Nokuya komi nompekiri iwetu?»

9 Umba to neliu nggamuda rauli, <Silakamu niampungimo,> atau manguli, <Pekanggore, onggotakamo ompa paturumu pade polumakomo?> Natantu neliu nggamuda manguli, <Silakamu niampungimo.>

10 Tapi Aku mompopokita ka komi Aku, Ana nu Manusia nakuasa mombaampungi silaka manusia ri dunia e'i.» Pade nipakauna topunggu etu,

11 «Pekanggore, onggotakamo ompa paturumu pade patinggulimo!»

12 Nangepe etu nekanggoremo topunggu etu. Kaliu-liu i'a nangonggotaka ompa paturuna pade nesuwumo i'a nikita mata ira pura-pura. Nanggita etu nogumaa puramo tau ri setu, pade ira nombatoiya Alatala ante nanguli, «Da'apa sanggani nikitata kajadia ewa e'!»

Yesus nompokio i Lewi mantuki I'a

Mat. 9:9-13; Luk. 5:27-32

13 Naopu etu nalau wo'umo Yesus mpaka ri wiwi rano. Tempo I'a ri setu narata puramo tau dea ri ja'ina, pade I'a nompatuduki ira.

14 Naopu etu tempo Yesus noliu ri setu, nikitana samba'a topomperapi balasitee to nosanga ka i Lewi, ana Alfeus, nekatoko ri kantor topomperapi balasitee. Nangulimo Yesus ka i'a, «Kamaimo, tukimo Aku.» Nangepe etu nekanggoremo i Lewi nalau nantuki Yesus.

15 Naopu etu nalaumo Yesus ante anaguruna nanggoni ri sapo i Lewi. Ri setu nadea wo'uo topomperapi balasitee bo tau-tau ntanina to nasilaka nanggoni mpasangani-nggani ante ira, sabana nadeamo ira to nantuki Yesus.

16 Tempo guru-guru agama to nantuki pepaduduki to Parisi nanggita Yesus nanggoni mpasangani ante topomperapi balasitee bo tau-tau nasilaka iwetu, nangulimo ira ka topantuki-topantuki I'a, «Nokuya gurumu nanggoni mpasangani-nggani ante topomperapi balasitee bo tau-tau to nasilaka?»

17 Sangga nangepe pompekutana etu, nangulimo Yesus ka ira, «Da'a tau-tau to naroso korona paraluu rapakuli dokutoro, aga tau-tau to naju'ana. Patuju karataku e'i da'a ala mompokio tau-tau nanao rarana, tapi ala mompokio tau-tau nasilaka.»

Tau nangontiaka Yesus sabana anaguruna da'a mapuasa

Mat. 9:14-15; Luk. 5:33-35

18 Naria sanggani anaguru-anaguru Yohanes Topedi bo tau-tau to Parisi napuasa. Tempo etu naria tau narata ri ja'i Yesus pade nompekutana I'a, «Nokuya anaguru-anaguru Yohanes bo topantuki-topantuki tau-tau to Parisi napuasa tapi topantuki-topantuki Komi da'a napuasa?»

19 Nesonomo Yesus ka ira ante porapa iwe'i: «Masipato torata mapuasa ri posusa mponika ane boti langgai danosanggani ante ira? Natantum da'a! Ane boti langgai danosanggani

¹ *bunggu ata nu sapo etu*: ata nu sapo-sapo ri tana Israel nggaolu nadele, nipowia nggari kayu to niiwu tana

ante ira da'a masipato ira mapuasa!

20 Tapi kana marata tempona boti langgai raala nggari ja'i ira. Tempo etumo ira kana mapuasa.»

Pepatuduki Yesus to nabou bo ada-ada Agama Yahudi da'a namala ratuki sanggani
Mat. 9:16-17; Luk. 5:36-39

21 Nanguli wo'umo Yesus, «Da'a ria tau nombatampala baju to narantana ante kae to nabouna. Sabana ane iwetu tampala kae to nabouna kana mosimpakuru mompakaseri baju to narantana etu. Kaopuna mantambai kaja'a seri nu baju etu.

22 Iwetu wo'u ante ue anggur. Da'a ria tau nombaisi ue anggur to nabouna riar pombolina to nasae. Sabana ane iwetu ue anggur to nabouna kana morende mompakaposo pombolina etu, sampe magero puramo, nabeloka ue anggur nabeloka pombolina. Tapi ue anggur to nabouna kana raisi riar pomboli to nabouna wo'u.»²

To Parisi nangontiaka Yesus sabana anaguruna nompui gando ri Eo Mpenonto
Mat. 12:1-8; Luk. 6:1-5

23 Naria saeo Eo Mpenonto Yesus ante anaguruna noliu ri tatongo ntinalu gando. Tempo ira noliu ri setu nompamulamo anaguru-anaguruna nompui gando sakedi.

24 Nanggita etu nangulimo tau-tau to Parisi ri setu, «Kitamo! Nokuya anaguru-anagurumu nombaliunaka Atura-atura agamata ante nowia anu nitagi ri Eo Mpenonto?»

25 Nesonomo Yesus, «Iwenumo? Da'apa nibasa komi tesa riar Buku Nagasa ewa powia i Daud nggaolu tempo i'a ante roa-roana naoro ta'i pade mana ria panggoni?

26 I'a nesua riar Sapo Alatala tempo Abyatar najadi Balengga Topanggeni Agama, pade nikonina roti to nipesomba ka Alatala ri setu. Pade niwaina wo'u ka roa-roana. Tapi kakonona nantuki Atura-atura agamata roti etu aga mamala rakoni topanggeni-topanggeni agama, da'a tau ntanina.»

27 Pade nanguli wo'umo Yesus ka ira, «Eo Mpenonto nipakatantu Alatala manggeni belo ka manusia. Manusia da'a nipajadi Alatala ala rapakasusa ada-ada Eo Mpenonto.

28 Jadi Aku, Ana nu Manusiamo to nakuasa ri Eo Mpenonto.»

3

Tau to namate palena sabingga nipakabelo Yesus ri Eo Mpenonto
Mat. 12:9-14; Luk. 6:6-11

1 Pade nesua wo'umo Yesus ri sapo mpodade. Ri setu naria samba'a tau to namate palena sabingga.

2 Bara sakuya mba'a tau-tau to Parisi ri setu nompariara mpakabelo-belo nanggita ane Yesus mompakabelo tau etu ri Eo Mpenonto ala ira mamala mompakasala I'a.

3 Nangulimo Yesus ka tau to namate palena etu, «Kamai pekanggoremo ri tatongona ri se'!»

4 Pade nekutanamo Yesus ka tau-tau to Parisi ri setu, «Nantuki Atura-atura agamata nuapa to nipaloga ka kita ri Eo Mpenonto, mowia to nabelona atau to naja'ana? Mompakasalama tau atau mompatesi tau?» Tapi ira aga nekalino da'a nenjui.

5 Yesus nanggita ira ntalili. Nasusa bo naraumo rarana sabana da'a naasi mata ira nanggita tau to namate palena. Pade nangulimo I'a ka tau etu, «Ojomo palemu!» Tau etu nangojo palena, pade kaliu-liu nabelo balimo palena etu.

6 Naopu etu nesuwumo tau-tau to Parisi nggari sapo mpodade etu pade kaliu-liu ira nalau nolibu ante topantuki-topantuki Magau Herodes mangelo jala ala ira mamala mompatesi Yesus.

Nadea tau nantuki Yesus sabana naria kuasana mompakabelo tau-tau naju'a

7 Pade nalaumo Yesus ante topantuki-topantuki I'a mpaka ri Rano Galilea. Nadea mpu'u tau nggari Bagia Galilea nantuki ira mpaka gusa'a. Nadea wo'u ira to narata nggari Bagia Yudea,

8 nggari ngata Yerusalem, nggari Bagia Idumea, nggari sambote Binangga Yordan, pade

² *pomboli ue anggur*: pomboli ue anggur to nipake to Yahudi nipowia nggari kulimba towau

nggari bagia namosu ngata Tirus bo Sidon. Ira pura-pura narata ri ja'i Yesus sabana nangepe lele to nantesa pura-pura nuapa to nipowiana.

9 Nadea mpu'u tau to nasiromu ri setu sampe Yesus nompakau topantuki-topantuki I'a mompakasadia saongu sakaya ka I'a ala ne'e sampe I'a rarumpa ira.

10 Etu najadi sabana nadea mpu'u tau naju'a nipakabelona bopia sampe pura-pura tau naju'a nosiaso-aso mompasimbuku mompakamosu I'a ala ira mamala manggabe I'a.

11 Tempo tau-tau to nipesua seta nanggita Yesus, nekadedemo ira ri ngayona ante nongare-ngare, «Komimo Ana nu Alatala!»

12 Tapi Yesus nombatagi seta-seta etu ala ne'e motesa sema kakonona I'a.

Yesus nompelisi sampulu romba'a anaguruna

Mat. 10:1-4; Luk. 6:12-16

13 Naopu etu nantendemo Yesus mpaka ri saongu bulu, pade nipokiona ri ja'ina isema tau to nipodotana. Tau to nipokiona etu narata puramo ri ja'ina,

14 pade nipelisina nggari tatongo ira sampulu romba'a tau momporoa I'a riaru bagona. Ira nipelisina ala rapakauna malau mompatolele Kareba Belo,

15 pade ala ira mamala rawai kuasa mompopalai seta-seta.

16 Sanga ira sampulu romba'a to nipelisina etumo: i Simon to nidaena wo'u i Petrus,

17 Yakobus ana i Zebedeus bo tua'ina Yohanes. Ira romba'a nidaena Boanerges, to naria batuana «Ana Guntu.»

18 Naria wo'u Andreas, i Filipus, i Bartolomeus, i Matius, i Tomas, Yakobus ana Alfeus, i Tadeus, i Simon to Zelote,

19 pade Yudas Iskariot to mompobalu I'a.

Guru-guru agama nanguli Yesus nompopalai seta ante kuasa nggari Magau nu Seta

Mat. 12:22-32; Luk. 11:14-23, 12:10

20 Naopu etu nesuamo Yesus raranjapo, pade narata wo'umo tau dea ri ja'ina sampe I'a ante anaguru-anaguruna da'a ntoto naria loga manggoni.

21 Tempo etu naria tau nanguli, «Nabayamo I'a!» Jadi sangga nangepe tesa etu naratamo indona bo sampesuwu-sampesuwuna ala mangala I'a matingguli ri sapo ira.

22 Nangulimo guru-guru agama to narata nggari ngata Yerusalem, «I'a nipesua i Beelzebul, Magau nu Seta. Ante kuasa nggari ja'i Tadulako nu seta etu I'a nompopalai seta nggari ja'i ntau!»

23 Nangepe etu Yesus nompokio guru-guru agama etu pade I'a notesa ka ira ante porapa iwe'i: «Natantumo Magau nu Seta da'a madota mompopalai roana.

24 Rapana maria samba'a magau pade todea riaru poparentana aga matibagi-bagi pade mosipobali, natantumo poparentana etu kana magero.

25 Pade ane tau sanjapo matibagi-bagi pade mosipobali, natantumo ira kana magaro mosimopotatare.

26 Iwetu wo'u ante Magau nu Seta. Ane i'a mangewa roana pade ira matibagi-bagi, natantumo poparentana da'a maroo. Mana masaeka magero.

27 Da'a ria tau namala mesua riaru njapo ntau to narosona ala mangago mbara-mbarana ane da'a ratipunggu ntani pue njapo to naroso etu. Ane iwetu i'a mamala mangago pura-pura isi njapona.³

28 Aku mpu'u-mpu'u notesa ka komi, mpengele-ngele silaka manusia bo tesa-tesa nanguli sinja'i namala raampungi.

29 Tapi isema-sema nanguli sinja'i Nosa Nagasa nu Alatala da'a ntoto mamala raampungi. Silaka ira etu da'a ria ampuna sampe ri kasae-saena.»

30 Yesus nanguli iwetu sabana naria tau nanguli I'a nipesua seta.

Tau-tau to nompowia dota Alatala nireke indo bo sampesuwu Yesus

Mat. 12:46-50; Luk. 8:19-21

31 Naopu etu naratamo indo bo sampesuwu-sampesuwu Yesus. Narata ri setu

³ Riaru porapa Yesus e'i Magau nu Seta nirapaka ewa pue njapo to narosona

nenggoremo ira ri sawalikuna pade nompakau tau mompokio Yesus momai mpaka ri ja'i ira.

32 Tempo etu nadea tau nekatoko nantalili Yesus. Ira nanguli ka I'a, «Kitamo, naria indomu bo sampesuwu-sampesuwumu ri sawalikuna. Ira madota mosirata ka Komi.»

33 Nesonomo Yesus ka ira, «Isema indoku bo sampesuwuku?»

34 I'a nanggita ira pura-pura to nekatoko nantalili I'a, pade niulina, «E'i puramo indoku bo sampesuwu-sampesuwuku.

35 Sabana isema-sema to nompowia dota Alatala, ira etumo nireke indoku bo sampesuwuku.»

4

Porapa ewa samba'a toposawu pae

Mat. 13:1-9; Luk. 8:4-8

1 Naria sanggani Yesus nompamula wo'umo nopaguru ri wiwi rano. Ri setu nadea mpu'u tau narata nantatiku I'a. Sabana etu I'a nalau nekatoko riar saongu sakaya to nolanto ri bunggu rano, pade tau dea nenggore ri kabatanana.

2 Pade nompamulamo I'a nompatuduki mpengele-ngele pepatuduki ka ira ante nompake porapa. Riar mporapana etu niulina iwe'i:

3 «Epemo! Naria samba'a tau nalau nosawu pae.

4 Tempo i'a nosawu naria sanu pae nanawu ri wiwi jala. Pade naratamo tonji-tonji nantunggu pae etu sampe naopu.

5 Naria wo'u sanu pae nanawu ri bunggu watu-watu to nakura tanana. Pae etu nasasinta natuwu sabana tana aga sakedi lau.

6 Tapi sangga napanepa eo nalelemo pae lako natuwu etu. Nangau puramo sabana da'a nandalaka kalena.

7 Pade naria wo'u sanu pae nanawu raranggarui. Natuwumo karui etu nangoo pae etu sampe da'a ria aselena.

8 Pade naria wo'u sanu pae nanawu ri tana to naboyana. Pae etu naboya pade nowua nabelo. Naria to nowua tolumpulu nggani kadeana, naria sanu onompulu nggani pade naria wo'u nowua satu nggani kadeana.»

9 Pade nanguli wo'umo Yesus ka ira, «Isema-sema naria talingana, epemo mpakabelo-belo tesaku e'i.»

Patuju Yesus nompatuduki tau dea ante porapa

Mat. 13:10-17; Luk. 8:9-10

10 Tempo Yesus damo njamba'ana naratamo topantuki-topantuki I'a ante sampulu romba'a anaguruna nerapi ala I'a mompakanoto ka ira batuana porapa etu.

11 Nangulimo Yesus ka ira, «Komimo to nipaloga mangginjani tesa ewa Poparenta nu Alatala to nitabuniaka nggari lamba pamulana. Tapi ane tau-tau ntanina, ira kana rapatuduki ante porapa-porapa

12 ala

<Naupa ira bate-batena manggita

da'a mesua ri pekiri ira,

naupa ira bate-batena mompetalinga

da'a ranjani ira batuana tesa etu.

Etu majadi ala ne'e ira majea

pade raampungu nu Alatala.> »

(Yes. 6:9-10)

Yesus nompakanoto batuana porapa ewa toposawu pae

Mat. 13:18-23; Luk. 8:11-15

13 Pade nangulimo Yesus ka ira, «Ane komi da'a namala mangginjani batuana porapa e'i iwenu komi mangginjani porapa-porapa ntanina?

14 Toposawu pae etu nirapaka ewa tau nompatolele Tesa nu Alatala.

15 Pae to nanawu ri wiwi jala nasimbayu ewa tau-tau to nangepe Tesa nu Alatala, tapi kaliu-liu narata Magau nu Seta nangala tesa etu to lako nesua riar pekiri ira.

16 Pae to nanawu ri bunggu watu-watu to nakura tanana nasimbayu ewa tau-tau to

nangepe Tesa nu Alatala pade kaliu-liu nantarima tesa etu ante nadamba rara.

17 Tapi Tesa etu da'a norali riaru nta'i ira sampe ira da'a naroo nomparasaya. Tempo ira nombarata kasusa bo pepandasa sabana nomparasaya Tesa nu Alatala etu, kaliu-liu ira nokanggaura.

18 Pade pae to nanawu raranggarui nasimbayu ewa tau-tau to nangepe Tesa nu Alatala pade nantarima Tesa etu.

19 Tapi ira nakini rara nantora katuwu ira ri dunia e'i. Ira aga nompekiri kakalumana pade ira naino ka mpengele-ngele mbara-mbara ri dunia. Pura-pura etu nombalawa Tesa nu Alatala sampe da'a ria aselena riaru nggatuwu ira.

20 Pade pae to nanawu ri tana to naboyana nasimbayu ewa tau-tau to nangepe Tesa nu Alatala pade nantarima Tesa etu riaru nta'i ira. Kaopuna naria asele nggari Tesa etu riaru nggatuwu ira. Naria sanu tolumpulu nggani kadeana, naria onompulu nggani kadeana pade naria sanupa satu nggani kadeana.»

Porapa ewa poindo

Luk. 8:16-18

21 Pade nanguli wo'umo Yesus ka ira, «Natantumo poindo da'a nikeni rara njapo pade niungo riaru tonda bara ri wayo ranja mpaturu. Tapi poindo etu kana raboli ri kalangana.

22 Sabana pura-pura nuapa to nitabuniaka we'i-we'i kana rapakanoto banepia, pade pura-pura nuapa anu da'apa nanoto ka tau we'i-we'i kana ranjani ntau pura-pura banepiana.

23 Isema-sema naria talingana, epemo mpakabelo-belo tesaku e'!»

24 Pade nanguli wo'umo Yesus ka ira, «Pariaru nta'imo nuapa to niepe komi! Ane komi mpu'u-mpu'u mompasimbuku mompariaru nta'i Tesa etu, kana ratambai ka komi pangginjani ewa Tesa etu.

25 Sabana isema-sema mompariaru nta'i Tesa nu Alatala kana ratambai ka ira pangginjani ewa Tesa etu. Tapi isema-sema da'a mompariaru nta'i Tesa nu Alatala etu, pangginjani Tesa etu to naria ri ja'ina kana raala nggari ja'ina.»

Pantambai kadea nu todea riaru Poparenta nu Alatala nggari Alatala mboto da'a manusia

26 Pade nangulimo Yesus, «Pantambai kadea ntau to majadi todea riaru Poparenta nu Alatala nasimbayu ewa samba'a tau nosawu ri tinaluna.

27 Tempo nggawengina i'a naturu. Tempo eona i'a nembangu pade pae to nisawuna nantambai eona nantambai kabetena, naupa da'a ninjanina iwenu sampe etu najadi.

28 Tana etu mbotomo to nompowia pae etu matuwu. Pamulana nesuwu kadana pade bulina pade panggaopuna wuanamo.

29 Ane natasamo pae nompamula tau etu nokato sabana temponamo mokato.»

Porapa ewa wua kayu to nakedina

Mat. 13:31-35; Luk. 13:18-19

30 Nanguli wo'umo Yesus, «Pantambai kadea ntau to majadi todea riaru Poparenta nu Alatala namala rapakasimbayu ewa nuapa? Porapa nuapa kupake mompakanoto etu?

31 Etu nasimbayu ewa saongu wua kayu nakedi mpu'u to nituja ri tinalu ntau. Wua kayu etu to nelu nggakedina nggari pura-pura wua kayu ri dunia.

32 Tapi ane nitujamo pade natuwupa i'amo to nelu nggabetena nggari tuja-tuja ntanina. Ra'a-ra'ana majadi mabete sampe tonji-tonji marata mowia jumuna ri kauluna.»

33 Iwetumo Yesus nompaguru tau dea ante nompake nadea porapa ewa etu nantuki pompakule ira mantarima tesa etu.

34 I'a bate-batena nompake porapa ane notesa ka tau dea. Tapi tempo I'a nosanggani-nggani ante anaguruna I'a notarangga mpakanoto pura-pura tesana ka ira.

Yesus nompopenonto poiri narambosu bo balumba-balumba bete

Mat. 8:23-27; Luk. 8:22-25

35 Ri kaede eo etu wo'u nangulimo Yesus ka anaguru-anaguruna, «Kamaimo kita mosakaya mpaka ri sambote rano e'i.»

36 Jadi anaguru-anaguru Yesus nompalasi tau dea pade nesawi sakaya to nipesawi Yesus. Pade nalaumo ira mpasanggani-nggani ante I'a. Naria bara sakuya ongu sakaya ntanina nosanggani-nggani ante ira.

37 Tempo ira nosakaya naratamo poiri narambosu mpu'u pade nompamulamo balumba-balumba bete nombarumpa sakaya ira sampe ue rano nesua riarana sakedi ira natala.
38 Tempo etu Yesus naturu ante nompake luna ri bagia puri nu sakaya etu. Jadi nalaumo anaguru-anaguruna nombalike I'a. Nangulimo ira ka I'a, «Guru, nokuya Komi nompalamba kita matala?»

39 Nangepe etu nembangumo Yesus pade nomparenta poiri bo balumba-balumba bete, «Penontomo bo kalinomo!» Naopu etu nenontomo poiri pade naotomo ue rano etu.
40 Pade nangulimo Yesus ka anaguruna, «Nokuya komi naeka? Nokuya komi da'a nomparasaya Aku?»

41 Nanggita kajadia etu naeka mpu'umo anaguru-anaguruna. Nosimpekutanamo ira samba'a bo samba'a, «Isema tanu kakonona tau e'i sampe poiri bo balumba nantuki parentana?»

5

Yesus nompakabelo samba'a tau nipakagila nu seta
Mat. 8:28-34; Luk. 8:26-39

1 Naopu etu naratamo Yesus ante anaguru-anaguruna ri sambote Rano Galilea ri bagia to Gerasa.

2 Iwetu Yesus nana'u nggari sakaya I'a nitomunaka samba'a langgai to nesuwu nggari tatongo dayo. Langgai etu nipakagila nu seta

3 pade i'a aga neto'o ri tatongo dayo-dayo. I'a mana namala nipo'u ntau nau damo nipo'u ante rante.

4 Nadea ngganimo kadana bo palena nipo'u ntau ante rante. Tapi rante nipompo'u i'a etu naopu pura nidapana, pade ase to nipasua nipombabalunggu kadana nikotona pura. Da'a ria kamba samba'a tau to nompakule manta'amaka i'a.

5 Eo wengi i'a aga nalau-nalau ri dayo bo ri bulu-buluna ante nongare-ngare pade nompakabela korona mboto ante watu.

6 Tempo Yesus danakawao nikitana, nangowamo i'a mpaka ri ja'ina pade nekadede nombasomba Yesus.

7 Nongaremo i'a ante suara namangga, «Yesus, Ana nu Alatala to Neliu Nggalangana, nuapa urusamu ante aku e'i? Aku merapi riaru sanga Alatala, ne'e mompandasa aku!»

8 Niulina iwetu sabana Yesus nompakau seta etu iwe'i: «Seta to naja'a, pesuwumo iko nggari ja'i ntau e'i!»

9 Pade nekutanamo Yesus ka tau etu, «Isema sangamu?»

Nesonomo tau etu, «Sangaku <Njobu-njobu,> sabana nadea mpu'u kami.»

10 Pade mpanggani-nggani tau etu nerapi ante mpu'u-mpu'u rarana ka Yesus ala seta-seta etu ne'e rapopalaina nggari bagia etu.

11 Namosu ante peto'o etu nadea mpu'u wawu nangelo panggonina ri kente nu bulu.

12 Jadi seta-seta riaru ntau etu nerapi ka Yesus, «Pakaumo kami mesua riaru wawu-wawu etu!»

13 Nangulimo Yesus, «Kaumo gusa'a!» Jadi nesuwumo seta-seta etu nggari ja'i ntau pane'a pade nesuamo ira riaru wawu-wawu nadea etu. Sangga nipesua seta-seta, nangowamo wawu-wawu etu notingganawu nggari wiwi bingge mpaka riaru rano sampe namate natala puramo. Kadea nu wawu etu kira-kira ronjobu onguna.

14 Tempo tau-tau to nombajagai wawu-wawu nanggita nuapa to najadi nangowamo ira nompatolele kajadia etu riaru ngata ira pade riaru ngata-ngata to namosuna. Sangga nangepe tesa etu, nalaumo tau dea nanggita nuapa to najadi.

15 Tempo ira narata ri ja'i Yesus nikita ira tau to nipesua njobu-njobu seta etu nekatoko ri setu. Nopakeamo i'a pade nanoto balimo pekirina. Nanggita etu naeka puramo ira.

16 Pade tau-tau to nanggita kajadia etu notesa ka tau-tau ntanina nuapa to najadi ri ja'i ntau to nipesua seta pade nuapa wo'u to najadi ri ja'i wawu-wawu.

17 Naopu etu pue ngata ri setu nerapi ante mpu'u-mpu'u ka Yesus ala I'a mompalasi bagia ira etu.

18 Tempo Yesus nesawi sakaya naratamo tau to nipesua seta pane'a nerapi ante mpu'u-mpu'u ala i'a mamala malau mpasanggani-nggani ante Yesus.

19 Tapi Yesus da'a nompaloga i'a. Niulina, «Ne'e. Panjilimo komi mpaka ri ja'i sampesuwumu pade tesa ka ira nuapa to nipowia i Pue ka komi. Uli ka ira iwenu Pue naasi matana nanggita komi.»

20 Jadi nalaumo tau etu pade nompamulamo i'a mompatolele ka tau-tau ri Bagia Sampulu Ngata ewa nuapa to nipowia Yesus ka i'a. Nangepe tesana etu nasumara puramo tau.

Tesa ana Yairus ante besi to nanggabe baju Yesus
Mat. 9:18-26; Luk. 8:40-56

21 Pade Yesus newote bali ante sakaya mpaka ri sambote rano. Sangga narata ri setu nadea mpu'u tau nasiromu nantaguni I'a. Tempo I'a da ri wiwi rano
22 naratamo samba'a topanggeniaka ri sapo mpodade nto Yahudi to nosanga ka Yairus. Sangga nikitana Yesus naratamo i'a nekadede ri ngayona
23 pade nerapi ante mpu'u-mpu'u ri ja'ina, «Uma, anaku besi naju'a ntomo, sakedika namate. Kuperapi ane mamala kamaimo ri ja'ina pade dikamo pale Komi ri korona ala i'a mabelo bali pade da'a mamate!»

24 Nangepe etu nalaumo Yesus nosanggani-nggani ante Yairus. Nadea mpu'u tau nantuki ira sampe nosiaso-aso nombawinggu Yesus.

25 Ri setu naria samba'a besi to naju'a nangote lei sampulu rompaemo kasaena.
26 Mpangani-ngganimo i'a nipakuli sando-sando sampe naopu puramo mbara-mbara to naria ri ja'ina nipobaluna nipombabayari sando-sando etu. Tapi da'a ntoto ria gunana. Ju'ana aga nantambai kaja'ana.
27 Tempo besi etu nangepe kareba Yesus, nalaumo i'a ri tatongo ntau dea nompakamosu Yesus nggari purina. Pade nikabena baju Yesus,
28 sabana nipekirina, «Nau aga bajuna kukabe, kana mabelo ju'aku.»
29 Sangga nanggabe baju Yesus, kaliu-liu nenontomo lei to niotena, pade nirasaina riaru korona nabelomo ju'ana.

30 Tempo etu wo'u Yesus nombarasai naria kuasa nesuwu nggari ja'ina. Jadi I'a nompeili tau dea etu pade nekutana, «Isema nanggabe bajuku pane'a?»

31 Nesonomo anaguru-anaguruna ka I'a, «Guru, nikita Komi mbotomo tau dea damo nosiaso e'i. Iwenu sampe Komi nekutana, <Isema nanggabe Aku?> »
32 Tapi Yesus kana nompenoto ri ntalilina mangelo tau to nanggabe I'a.
33 Besi etu ninjanina nuapa to najadi ri korona. Jadi ante nolalete bo naeka rarana nekadedemo i'a ri ngayo Yesus pade nipangakuna ka I'a pura-pura nuapa to najadi pane'a.

34 Nangepe etu nangulimo Yesus ka I'a, «Anaku, sabana komi nomparasaya Aku nabelomo ju'amu. Panjilimo ante mabelo. Da'a mana komi maju'a iwetu.»

35 Tempo Yesus danotesa, naratamo bara sakuya mba'a tau nggari sapo Yairus, topanggeniaka ri sapo mpodade etu. Nangulimo ira ka Yairus, «Uma, namatemo anamu. Nabelopa ne'e mana mompakasusa guru malau mpaka ri sapomu.»

36 Tapi Yesus da'a nompariara tesa ira etu. Niulina ka Yairus, «Ne'e maeka! Parasyamo Aku!»

37 Pade da'a nipaloga Yesus tau dea nantuki I'a mpaka ri sapo Yairus. Aga ira i Petrus, Yakobus bo Yohanes tua'i Yakobus to nipalogana mantuki I'a.

38 Tempo ira narata ri sapo Yairus, Yesus nanggita tau-tau nakanano mpu'u. Naria tau notumangi bo nantete ante suara namangga.
39 Nesuamo Yesus raranjapo pade niulina ka ira, «Nokuya komi nakanano bo nantete iwetu? Ngana etu da'a namate. I'a aga napisi.»

40 Nangepe etu ira aga nompongiri-ngiri I'a.
Tapi Yesus nompopalai ira pura-pura nggariara njapo etu. Pade nipakenina indo uma nu ngana etu ante tolumba'a anaguruna to nosanggani ante I'a, pade nesuamo ira ri tombi ngana etu.

41 Pade nisoko Yesus pale ngana besi etu ante nanguli, «Talita kum.» Batuana, «Ngana

besi, kuuli ka iko, pembangumo.»

42 Kalii-liu nembangumo ngana besi etu pade nompamulamo i'a nolumako. Umuru nu ngana besi etu sampulu rompaemo. Nanggita kajadia etu nogumaa mpu'umo ira ri setu.
43 Pade Yesus nombatagi ira, «Ne'e ntoto motesa ka tau ntanina nuapa to najadi ri se'i!» Pade niparentana wo'u ala ngana besi etu rawai panggoni sakedi.

6

Yesus da'a nitarima pue ngata Nazaret
Mat. 13:53-58; Luk. 4:16-30

1 Pade nalaimo Yesus nggari setu nanjili mpaka ri ngatana mboto mpasangani-nggani ante anaguru-anaguruna.

2 Ri tempo Eo Mpenonto nompamulamo I'a nopaguru ri sapo mpodade ri setu. Tau dea to naria ri setu natekaja mpu'u nangepe I'a. Ira nanguli, «Nggari umba tanu nipombaratana pangginjanina etu? Nggari umba tanu noto nipakena mompatuduki iwetu? Iwenu sampe I'a namala mompowia kabaraka-kabaraka?

3 I'a e'i aga topowia parewa nggari kayu, ana i Maria bo tuaka Yakobus, Yoses, Yudas bo i Simon! Pade tua'ina besi wo'u naria ri tatongota ri se'i!» Etu sampe ira da'a madota momparasaya I'a.

4 Tapi nangulimo Yesus ka ira, «Samba'a nabi nibila ntau ri umba-umba ngata ntanina. Tapi ri ngatana mboto ri tatongo sampesuwuna bo ira saongu njapo i'a da'a ria nibila.»

5 Pade da'a namala Yesus mompowia nadea kabaraka ri setu. I'a aga namala nompakabelo bara sakuya mba'a tau naju'a ante nombadika palena ri koro ira.

6 Natekaja mpu'umo I'a sabana tau ri setu da'a momparasaya I'a.

Yesus nompakau sampulu romba'a anaguruna manggeni Kareba Belo
Mat. 10:5-15; Luk. 9:1-6

Naopu etu nalaumo Yesus nompebutu ngata ri bagia etu bo nompaguru tau dea.

7 I'a nompokio sampulu romba'a anaguruna mpaka ri ja'ina pade nipakauna ira malau romba'a-romba'a sanjala. Niwaina ka ira kuasa ala ira mamala mompopalai seta-seta,

8 pade nitewaina ka ira iwe'i: «Ne'e komi manggeni bara nuapa-nuapa riaru mpolumakomu. Ne'e manggeni baku bara batutu rapomboli panggoni bara doi ri karepe. Tapi to mamala rakeni aga lembau.

9 Komi mamala mompake sapatu, tapi ne'e manggeni baju rontonga.»

10 Pade niulina wo'u ka ira, «Ane komi marata ri saongu ngata pade maria pue njapo mompopesai komi, peto'omo komi ri sapo etu sampe komi malai mompalasi ngata etu.

11 Tapi ane maria pue ngata da'a madota mantarima komi ri ngata ira bara mangepe pepatudukimu, palasimo ngata etu. Pade sapunaimo sowu nggari kadamu ala majadi popatora ka ira ri setu ira kana rasuku Alatala.»

12 Naopu etu nalaumo ira sampulu romba'a nompatolele ka tau dea ala ira kana majea nggari silaka-silaka ira.

13 Pade ira nompopalai nadea seta nggari ja'i ntau nipesua seta, pade nadea tau to naju'a nigese ira lana pade nompakabelo ju'a-ju'a ira.

Tesa kamate Yohanes Topediu
Mat. 14:1-12; Luk. 9:7-9

14 Kareba Yesus niepe Magau Herodes wo'umo, sabana natolelemo sanga Yesus mpaka ri umba-umba. Naria tau to nanguli, «I'a etu Yohanes Topediu to natuwu bali. Etu sampe naria kuasa ri ja'ina mowia kabaraka-kabaraka.»

15 Tapi naria tau ntanina nanguli, «I'a etumo nabi Elia.» Pade naria wo'u to nanguli, «I'a etu samba'a nabi nasimbayu ewa nabi-nabi nggaolu.»

16 Tapi tempo Magau Herodes nangepe tesa-tesa etu nangulimo i'a, «Natantumo I'a etu Yohanes Topediu! Bopia nipakauku tau nombatempo balenggana. Tapi we'i-we'i natuwu balimo i'a!»

17-18 Iwe'imo sabana Magau Herodes nompekiri iwetu. Bopia i'a nomporongu i Herodias,

rongo nu sampesuwuna mboto to nosanga ka i Filipus. Naopu etu nadea ngganimo Yohanes Topediui nangontiaka Magau Herodes sabana pokaingguna etu. Niulina ka i Herodes iwe'i: «Nantuki Atura-atura agamata da'a ntoto masipato komi mangala rongo nu sampesuwumu mboto!» Etu sampe Magau Herodes nompakau tantarana nanjoko Yohanes pade nombasuaraka i'a riara tarunggu.

19 Tempo etu nabilisi mpu'umo rara i Herodias ri ja'i Yohanes. I'a madota mompatesi Yohanes tapi da'a namala,

20 sabana Magau Herodes naeka rarana ri ja'i Yohanes. Ninjanina Yohanes samba'a tau nanao bo nagasa rarana. Jadi Yohanes nikalendu Magau Herodes mpakabelo-belo riara tarunggu. Tempo i Herodes nangepe tesa-tesa Yohanes, naingu rarana. Tapi naupa iwetu nipokonona wo'u nangepe tesana etu.

21 Kaopuna i Herodias nombarata loga to nabelo ala Yohanes namala rapatesi. Ri eo jadina mboto Magau Herodes nompowia posusa, pade i'a nombagaga pura-pura pangga bete bo balengga-balengga tantara bo totu'a-totu'a nggari njumaongu Bagia Galilea.

22 Tempo posusa etu nesuamo ana randoo i Herodias nojoge ri ngayo ira pura-pura. Randoo etu mpu'u-mpu'u nompakadamba rara Magau Herodes bo torata-toratana etu. Jadi nangulimo i Herodes ka i'a, «Tesamo nuapa-nuapa mupodota, etu kana kuwai ka iko.»

23 Pade i'a nojanji ka randoo etu ante netunda, «Nuapa-nuapa muperapi kana kuwai ka iko, nau sampe santongo nggari poparentaku!»

24 Nangepe etu nesuwumo randoo etu nalau nekutana ka indona, «Nindo, nuapa masipato kuperapi nggari ja'i Magau Herodes?»

Nesonomo indona, «Perapimo balengga Yohanes Topediui!»

25 Jadi natinggulimo randoo etu nasasinta mpaka ri ja'i Magau Herodes pade niulina, «Magau, to kuperapi ala balengga Yohanes Topediui rawai ka aku we'i-we'i raboli riara santonga dula!»

26 Nangepe pomperapi randoo etu nasusa mpu'umo rara Magau Herodes. Tapi da'a nabia i'a nompoara pomperapi etu sabana i'a nojanji ante netunda ri ngayo torata-toratana.

27 Jadi tempo etu wo'u nipakauna samba'a tantarana malau manggeni balengga Yohanes mpaka ri ja'ina. Pade nalaumo tantara etu mpaka riara tarunggu nombatempo tambolo Yohanes.

28 Pade nikeninamo balengga Yohanes etu niboli riara santonga dula pade niwaina ka randoo etu. Naopu etu randoo etu nombawai balengga etu ka indona.

29 Sangga nangepe kareba etu, naratamo anaguru-anaguru Yohanes mangala watabakuna nggariara tarunggu pade nitana ira ri dayo.

Yesus nompakoni limanjobu mba'a tau
Mat. 14:13-21; Luk. 9:10-17; Yoh. 6:1-13

30 Anaguru-anaguru to nipakau Yesus nanggeni Kareba Belo nanjili bali pade nasiromu mpasanggani-nggani ante Yesus. Pade ira nombatesa ka I'a pura-pura nuapa to nipowia ira bo to nipatuduki ira.

31 Naopu etu nangulimo Yesus ka ira, «Kamaimo kita mompatani ri peto'o to nakalinoana ala mamala mangosaraka sampalai.» Niulina iwetu sabana aga nosinjambei tau narata ri ja'ina sampe ira nau aga nanggoni da'a nakapo.

32 Jadi nalaumo ira nesawi sakaya mpaka ri peto'o to nakalinoana.

33 Tapi tau dea nanggita ira nosakaya nalau, pade ninjani ira patuju Yesus bo anaguruna. Jadi nalaumo tau dea nggari pura-pura ngata nantuki jala kabatana mokolu ka Yesus bo anaguruna mpaka ri peto'o to nikalau ira.

34 Tempo Yesus nana'u nggariara sakaya nikitana nadea mpu'u tau nasiromu ri setu. Nanggita etu naasi mpu'umo matana sabana ira nasimbayu ewa bimba-bimba da'a ria topoewuna. Jadi nompamulamo I'a nompaguru ka ira mpengele-ngele pepatuduki.

35 Sangga nangguwiapa da'a mana masaeka mawengi, naratamo anaguru-anaguru Yesus nanguli ka I'a, «Guru, peto'o e'i nakalinoana pade mana masaeka mawengi.

36 Agina tau dea etu rapakau matingguli ala ira mamala mangoli panggoni ri ngata-ngata bo boya-boya to namosuna.»

Yesus nangontiaka to Parisi sabana ira nompariba'a ada-ada ntotu'a bo nanjapuaka parenta nu Alatala
Mat. 15:1-9

1 Naria sanggani tau-tau to Parisi bo bara sakuya mba'a guru agama nggari ngata Yerusalem narata ri ja'i Yesus.

2 Ira nanggita bara sakuya mba'a anaguru Yesus nanggoni ante da'a norama pale ntani ruru nantuki ada-ada nto Parisi.

3 Ane tau-tau to Parisi bo pura-pura tau to Yahudi ntanina da'apa mamala manggoni ane ira da'apa morama pale nantuki ada-ada ntotu'a ira nggaolu.

4 Wa'a wo'u ane ira manjili nggari potomu. Da'apa ira manggoni ira kana morama pale ntani nantuki ada-ada ntotu'a. Pade nadea wo'u ada-ada ntanina to nipasumuli nggari totu'a ira nggaolu to nituki ira. Jonjona, ira kana norama sanggiri, jolo bo parewa-parewa ntanina to nipowia nggari tambaga.

5 Jadi etumo sabana tau-tau to Parisi bo guru-guru agama etu nekutana ka Yesus, «Nokuya anaguru-anagurumu da'a nantuki ada-ada ntotu'ata nggaolu? Nokuya ira aga nanggoni ante pale da'a nirama?»

6 Nesonomo Yesus ka ira, «Komi tau-tau aga nabelo ri lenje! Nakono mpu'u Tesa nu Alatala to nipasimbayu nabi Yesaya nggaolu ewa komi. Nitulisina iwe'i:
<Tau-tau e'i aga nombabila Aku ri sumba,
tapi da'a ante mpu'u-mpu'u rara ira.

7 Da'a ntoto ria gunana ira mepue ka Aku, sabana ira nompatuduki ada-ada nu manusia ante nanguli etu parenta-parenta nu Alatala.>
(Yes. 29:13)

8 Jadi parenta-parenta Alatala da'a nipariba'a komi tapi ada-ada nu manusia nisoko komi ante naroso.»

9 Pade nanguli wo'umo Yesus ka ira, «Nata'u mpu'umo komi nanjapuaka parenta Alatala ala matundu riaru ada-ada komi mboto.

10 Jonjona, nabi Musa nanguli iwe'i: <Bilamo indo umamu,>⁵
pade niulina wo'u, <Isema-sema manguli sinja'i umana bara indona i'a kana rapatesi.>⁶

11 Tapi komi nompatuduki iwe'i: <Da'a mokuya ane samba'a tau manguli ka indo bo umana nuapa to masipato rapakena mantulungi ira nirekena pesomba ka Alatala.>

12 Pade ane i'a mowia iwetu komi mana mompaloga i'a mantulungi indo bo umana.

13 Jadi ante iwetu komi nanjapuaka Tesa nu Alatala ante nompariba'a ada-ada ntotu'a to nipasumuli ka komi. Pade nadeapa ntani-ntanina to nipowia komi nasimbayu ante etu.»

Nuapa to nompakatantoru manusia riaru mpanggita Alatala
Mat. 15:10-20

14 Pade sangganipa Yesus nompokio tau dea marata ri ja'ina, pade nitesana ka ira porapa e'i: «Umba komi pura-pura, epemo tesaku e'i pade pekirimo batuana.

15 Da'a ria sangele nggari sawalikuna to nesua riaru manusia mamala mompakatantoru ira riaru mpanggita Alatala. Tapi pokainggu to naja'a to nopo'u nggariara nta'i manusia, etumo to nompakatantoru ira riaru mpanggita Alatala.

16 Isema-sema naria talingana, epemo mpakabelo-belo tesaku e'i.»

17 Naopu etu Yesus nompalasi tau dea pade nesua raranjapo. Tempo etu nekutanamo anaguruna ka I'a ewa batuana porapa to lako nitesana pani'a.

18 Nangulimo Yesus ka ira, «Iwenumo? Komi wo'u naingu nasimbayu ewa tau dea pani'a? Da'apa nanoto ka komi batuana porapa etu? Da'a ria panggoni to nikoni manusia mamala mompakatantoru i'a riaru mpanggita Alatala.

19 Sabana panggoni etu da'a nesua riaru pekirina tapi aga nesua riaru nta'i likona, pade nggari setu aga niotena mpanjili.» Ante nanguli iwetu, Yesus nompakatantu mpengele-

⁵ Kel. 20:12

⁶ Kel. 21:17

ngele panggoni namala rakoni, da'a ria to nipopali.

20 Pade nanguli wo'umo Yesus, «Nuapa to nesuwu nggari pekiri manusia etumo to nompakatantoru ira riaru mpanggita Alatala.

21 Sabana nggariarana, etumo nggariara nta'ina neumba pompekiri-pompekiri to naja'a to nanggeni tau nogau sala ante tau da'a rongona mboto, nangangga, nepatesi,

22 nebualo, da'a nabasa-basa naino ka mbara-mbara ntau, nowia kaja'ana, nebagiu, da'a nabasa-basa nantuki dota rara to naja'ana, nasiriati, nanguli sinja'i, nasombo, pade noinggu nadoyo.

23 Pokainggu to naja'a etumo to neumba nggariara manusia pade nompakatantoru ira riaru mpanggita Alatala.»

Pomparasaya samba'a besi da'a to Yahudi
Mat. 15:21-28

24 Naopu etu nalaumo Yesus mpaka ri bagia namosu ngata Tirus. Narata ri setu nesuamo I'a raranjapo. Patujuna ala ne'e rakita ntau dea. Tapi karatana ri bagia etu da'a namala nitabuniaka.

25-26 Ri setu naria samba'a besi da'a to Yahudi nggari Bagia Siro Fenisia. Ana besi nggari besi etu nipesua seta. Jadi iwetu i'a nangepe lele Yesus naria ri ngata etu, naratamo i'a nekadede ri ngayona nerapi ante mpu'u-mpu'u rara, «Tulungimo aku, popalaimo seta nggari ja'i anaku!»

27 Tapi nangulimo Yesus ka i'a, «Pakambamo ngana-ngana manggoni ntani ruru sampe mabosu. Sabana da'a masipato mangala panggoni ngana-ngana ratajiaka ka asu.»

28 Nangulimo besi etu, «Nakono to niuli Komi, Pue. Tapi asu ri wayo meja wo'u nanggoni rombo-rombo mpanggoni to nanawu nggari ja'i ngana-ngana.»⁷

29 Pade nanguli Yesus ka i'a, «Nakonomo tesamu. Sabana etu panjilimo we'i-we'i. Nalaimo seta etu nggari ja'i anamu.»

30 Pade nanjilimo besi etu. Sangga narata ri saponu nikitano anana besi naturu ri ompa paturuna pade seta etu nalaimo nggari ja'ina.

Yesus nompakabelo samba'a tau to nabongo bo nabobo

31 Naopu etu Yesus nompalasi Bagia Tirus pade napolamo I'a noliu ri ngata Sidon mpaka ri Rano Galilea. Riaru mpolumakona I'a nantuki jala ri Bagia Sampulu Ngata.

32 Narata ri setu naria tau nanggeni roana to nabongo bo nabobo mpaka ri ja'ina. Pade ira nerapi ka Yesus ante mpu'u-mpu'u rara ala I'a mombadika palena ri koro ntau etu ala mompakabelo i'a.

33 Yesus nanggeni tau etu nggari ja'i ntau dea, pade nisuarakana koyampalena riaru talinga ntau etu. Naopu etu nitailuna palena pade nituina ka jila ntau etu.

34 Naopu etu Yesus nantingoa langi ante nangore nosana, pade niulina ka tau etu riaru Basa Ibrani, «Efata!» Batuana, katebeamo!

35 Pade natebeamo talinga ntau etu, pade nalulu balimo jilana sampe i'a namala notesa ante nabelo.

36 Pade Yesus nompakau ira pura-pura ala ne'e mombatesa kajadia etu ka tau-tau ntanina. Tapi nantambai nitagi nantambai ira nompatolele kajadia etu.

37 Sangga nangepe kajadia etu nogumaa mpu'umo tau dea. Ira nanguli, «Pura-pura to nipowiana nabelo! Tau nabongo nipakabelona talingana sampe namala neepe, pade tau nabobo wo'u nipakabelona sampe namala notesa ante nabelo!»

8

Yesus nompakoni patanjobu mba'a tau
Mat. 15:32-39

1 Tempo etu naria wo'umo tau dea nasiromu ri ja'i Yesus pade mana ria panggoni ira. Jadi

⁷ asu: nabiasa tau-tau to Yahudi nanguli tau-tau da'a to Yahudi asu

Yesus nompokio anaguru-anaguruna ri ja'ina pade niulina ka ira,

2 «Naasi mpu'umo matakun nggita tau dea e'i, sabana tolumbengimo ira nosangganingngani ante Aku ri se'i sampe mana ria panggoni ira.

3 Pade ane ira kupakau manjili ante maoro, natantumo ira kana maletu pade madungga ri jala, sabana naria ira to narata nggari peto'o to nakawaona.»

4 Nesonomo anaguru-anaguruna, «Iwenumo? Kita e'i ri peto'o nakalinoa. Nggari umbamo rapangalata panggoni rapakoni ka tau dea e'i ala mabosu?»

5 Jadi nekutanamo Yesus ka ira, «Sakuya ongu roti to naria ri ja' komi?»
Nesono ira, «Pituongu.»

6 Nangepe etu Yesus nompakau tau dea etu nekatoko ri tana. Naopu etu nialana roti pituongu etu pade niulina tarima kasi ka Pue Alatala. Pade nibingga-binggana roti etu pade niwaina ka anaguru-anaguruna ala rapalele ka tau dea. Pade anaguru-anaguruna nompalele roti etu ka ira.

7 Naria wo'u bara sakuya mba'a bau ri ja' ira. Sangga niganenapa nipakaunamo anaguruna nompalele bau etu ka tau dea.

8 Pura-pura tau nanggoni sampe nabosu. Naopu etu nipasiromu iramo labi-labi mpanggoni etu naponupa pitu karanji.

9 Kadea ira to nanggoni ri setu kira-kira patanjobu mba'ana. Naopupa ira nanggoni Yesus nompakau ira manjili.

10 Sangga nalaipa tau dea etu Yesus ante anaguruna nesawi sakaya nalau mpaka ri Bagia Dalmanuta.

To Parisi nerapi ala Yesus mowia tandai to nipogumaa
Mat. 16:1-4

11 Pade naratamo bara sakuya mba'a tau to Parisi mpaka ri ja' Yesus. Nompamulamo ira nosisono ante I'a sabana ira madota mompesoba I'a. Nangulimo ira ka I'a, «Kawiamo sangaya tandai to nipogumaa ala mompopokita ka kami Komi mpu'u-mpu'u nipakau Alatala.»

12 Nonguamo Yesus riar nta'ina pade niulina ka ira, «Nokuya komi to natuwu we'i-we'i batena merapi tandai to nipogumaa? Aku mpu'u-mpu'u notesa ka komi, komi e'i da'a ntoto rapopokita ka tandai to nipogumaa iwetu!»

13 Naopu etu Yesus nompalasi ira pade nalau nesawi sakaya mpaka ri sambote rano.

Yesus nompopatora anaguruna ne'e mantuki pokainggu tau-tau to Parisi
Mat 16:5-12

14 Tempo nesawi sakaya da'a nitara anaguru Yesus nanggeni baku. To nikeni ira riar sakaya aga saongu lau roti.

15 Nangulimo Yesus ka ira, «Pakabelo-belo! Komi kana mainga ala ne'e mawela ragi tau-tau to Parisi bo ragi Magau Herodes.»

16 Nangepe etu notesamo ira samba'a bo samba'a, «Masipato I'a nanguli iwetu sabana da'a ria roti ri ja'ita se'i.»

17 Ninjani Yesus nuapa to nitesa ira etu. Jadi niulina ka ira, «Nokuya komi nanguli, <Da'a ria roti ri ja'ita?> Iwenumo? Da'apa nanoto rara komi? Da'apa ninjani komi batua nu tesaku pani'a? Bara nabungu pekiri komi!

18 Komi nomata tapi nokuya komi da'a namala nekita? Komi notalinga tapi nokuya komi da'a namala neepe? Da'a nitara komi to najadi bopia?

19 Tempo Aku nombabingga-bingga limaongu roti nipakoni ka limanjobu mba'a tau, sakuya tonda labina to nipasiromu komi?»
Nesonomo ira, «Sampulu rotonda.»

20 Pade nanguli I'a, «Tempo pituongu roti nibinggaku nipakoni ka patanjobu mba'a tau, sakuya karanji labina to nipasiromu komi?»
Nesonomo ira, «Pituongu karanji.»

21 Pade nanguli Yesus, «Ane iwetu nokuya komi da'apa nangginjani batua nu tesaku pani'a?»

Yesus nompakabelo mata samba'a toburo ri ngata Betsaida

22 Naopu etu naratamo ira ri ngata Betsaida. Ri setu naria tau nanggeni samba'a toburo mpaka ri ja'i Yesus pade ira nerapi ala Yesus mombadika palena ri mata ntau etu.

23 Jadi Yesus nanjoko pale ntoburo etu pade nikenina mpaka ri sawaliku ngata. Ri setu Yesus nantailu mata ntau etu pade nidikana palena ri matana. Naopu etu nekutanamo I'a ka toburo, «Namalamo komi nanggita nuapa-nuapa?»

24 Tau etu nanggita mpaka ri koluna pade niulina, «Iyo! Aku nanggita tau nolumako. Tapi nikitaku ira aga ewa pu'u-pu'u nggayu!»

25 Nangepe etu sangganipa Yesus nombadika palena ri mata ntoburo etu. Naopu etu toburo mpu'u-mpu'u nompasimbuku nanggita. Pade nabelomo matana sampe i'a namala nanggita nuapa-nuapa ante nanoto.

26 Naopu etu Yesus nompakau i'a manjili. Niulina, «Panjilimo, ne'e mana mesua bali rara ngata etu.»

Petrus nompangaku Yesus Magau to Mompakasalama to nijanji Alatala
Mat. 16:13-20; Luk. 9:18-21

27 Naopu etu nalaumo Yesus ante anaguru-anaguruna mpaka ri ngata-ngata to namosu ngata Kaisarea Filipi. Ri tatongo jala nekutanamo Yesus ka ira, «Nantuki tesa ntau dea, isema kakonona Aku e'i?»

28 Nesonomo ira, «Naria to nanguli Komi Yohanes Topediu to natuwu bali, pade naria wo'u sanu nanguli Komi nabi Elia to neumba bali. Pade naria wo'u to nanguli Komi samba'a nggari nabi-nabi nggaolu to natuwu bali.»

29 Pade nekutanamo Yesus ka ira, «Tapi nantuki pombarata komi, isema Aku e'i?»
Nesonomo i Petrus, «Komimo Magau to Mompakasalama to nijanji Alatala!»

30 Nangepe etu nangulimo Yesus ka ira, «Ne'epa ratesa ka tau-tau ntanina isema Aku e'i.»

Yesus nombaboto kamatena banepia
Mat. 16:21-28; Luk. 9:22-27

31 Naliu etu nompamulamo Yesus nompatuduki anaguru-anaguruna. Niulina, «Aku, Ana nu Manusia kana mombarasai mpengele-ngele kasusa. Aku kana rapoara totu'a-totu'a ntu Yahudi bo balengga-balengga topanggeni agama bo guru-guru agama. Pade Aku kana rapatesi ira. Tapi ri eo katolueona Aku kana matuwu bali.»

32 Etu pura-pura nitesa Yesus ka ira ante nanoto.

Nangepe etu i Petrus nanggeni Yesus mpaka ri sabinggana pade nangontiaka I'a. Niulina, «Guru, ne'e motesa-tesa iwetu!»

33 Tapi Yesus nakampeili nanggita anaguru-anaguruna, pade niontiakana i Petrus, «Palaimo iko nggari se'i, Magau nu Seta! Pompekirimu etu pompekiri manusia, da'a pompekiri nggari ja'i Alatala!»

34 Naopu etu Yesus nompokio tau dea ri setu mpaka ri ja'ina nosanggeni-nggani ante anaguruna pade niulina ka ira, «Isema-sema madota majadi topantuki Aku, i'a kana mombakabasaka dota rarana mboto pade masadia mantuki Aku nau sampe mamate rapaku ri kayu parika.

35 Sabana isema-sema da'a masadia mantuki Aku nau sampe mamate i'a da'a mombarata katuwua mabelo sampe ri kasae-saena. Tapi isema-sema to mombakabasaka pura-pura dotana mboto pade mantuki Aku bo manggeni Kareba Belo nau sampe rapatesi, i'a kana mombarata katuwua mabelo sampe ri kasae-saena.

36 Natantum da'a ntoto ria gunana ane samba'a tau mombarata pura-pura nuapa to naria riaru dunia e'i tapi da'a masalama, aga rasuku sampe ri kasae-saena ri naraka.

37 Da'a ria nuapa-nuapa to namala rasulata ante katuwua mabelo etu.

38 Isema-sema maeya mompangaku Aku bo tesa-tesaku ri tatongo tau-tau to nasilaka bo tau dea to da'a natutu nantuki Alatala, Aku, Ana nu Manusia wo'u maeya mompangaku i'a tempo Aku marata bali ri dunia e'i. Tempo etu Aku kana marata ante reme bo kuasa nu

Umaku, nosangani-nggani ante malaeka-malaeka to nagasana!»

9

1 Pade niulina wo'u ka ira, «Aku mpu'u-mpu'u notesa ka komi, naria bara sakuya mba'a tau ri tatongo komi ri se'i da'apa mamate ane da'apa rakita ira Alatala mompamula moparenta ante kuasana.»

Yesus nipakareme Alatala ri bunggu nu bulu
Mat. 17:1-13; Luk. 9:28-36

2 Onombengi kaliuna Yesus nanggeni i Petrus, Yakobus bo Yohanes mpasangani-nggani nalau nantende mpaka ri saongu bulu to nalangana. Ri setu aga ira mboto, da'a ria tau ntanina. Tempo ira ri setu sampegoli nabalimo lenje Yesus ri ngayo ira.

3 Pakeana nabula nju'u damo nenggila. Da'a ria samba'a tau ri dunia e'i to mamala mantapasi pakeana ewa kagasana bo kabulana pakea Yesus etu.

4 Pade ira tolumba'a nanggita nabi Elia bo nabi Musa nggaolu notesa-tesa ante Yesus.

5 Nanggita etu nangulimo i Petrus ka Yesus, «Guru, nasana mpu'u kami ri se'i. Nabelopa kami mowia toluongu pakumpa ri se'i, saongu ka Komi, saongu ka i Musa bo saongu ka Elia.»

6 Kakonona da'a ninjani Petrus nuapa to masipato ratesana sabana naeka mpu'umo rara ira tolumba'a.

7 Tempo etu naratamo kulimu nombabungu ira pura-pura, pade nggariara kulimu etu niepe ira suara nanguli, «E'imo Anaku to nipotoweku. Epe komimo tesana!»

8 Sampida mata lau ira nanggita ntalili, mana nikita ira tau romba'a pani'a. To nikita ira damo Yesus njamba'ana.

9 Tempo ira notua nggari buluna etu Yesus nompopatora ka ira, «Ne'e motesa ka isema-sema nuapa to nikita komi pani'a ane da'apa Aku, Ana nu Manusia matuwu bali nggari tatongo ntau to namatena.»

10 Ira nompariara popatora Yesus etu, tapi ira nosimpekutana samba'a bo samba'a nuapa patuju Yesus nanguli, «Matuwu bali nggari tatongo ntau to namatena.»

11 Pade nekutanamo ira ka I'a, «Nuapa sabana guru-guru agama nanguli nabi Elia kana mokolu marata pade Magau to Mompakasalama?»

12 Nesonomo Yesus, «Nakonomo tesa ira. Nabi Elia kana mokolu marata ala mompakasiayu mpengele-ngele. Tapi ane iwetu, nuapa patuju nu tesa to nitulisi riaru Buku Nagasa to nanguli Ana nu Manusia kana mombarasai madea kasusa pade rasalai ntau dea?

13 Tapi kuuli ka komi, kakonona naratamo nabi Elia, pade tau-tau nompowia ka i'a nantuki dota ira, nasimbayu ewa to nitulisi nggaolu riaru Buku Nagasa ewa i'a.»⁸

Yesus nompakabelo samba'a kabilasa to nipesua seta
Mat. 17:14-21; Luk. 9:37-43a

14 Tempo Yesus, i Petrus, Yakobus pade Yohanes nanjili ri ja'i anaguruna ntanina, nikita ira tau dea nantalili anaguru-anaguruna etu. Pade naria bara sakuya mba'a guru agama nosisono-sono ante anaguru Yesus.

15 Tempo tau dea nanggita Yesus natekajamo ira, pade ira nangowa nantomunaka I'a.

16 Nekutanamo Yesus ka ira, «Nuapa to niposinjono komi pani'a?»

17 Nesonomo samba'a nggari tatongo ntau dea etu, «Guru, aku nanggeni anaku mpaka ri ja'imu sabana i'a nipesua seta to nompakabobo i'a.

18 Butu nggani seta etu nesua ri ja'ina i'a nidungganakana mpaka ri tana. Pade ngangana nawura, bagana nosinggiki pade korona najadi nako'o. Niperapiku ka anagurumu ala ira mompopalai seta etu, tapi ira da'a nompakule.»

19 Nangepe etu nangulimo Yesus ka ira, «Iwenu tanu komi? Komimo tau mpu'u-mpu'u

⁸ Tesa Yesus e'i nosingawela ante Yohanes Topediu. Kitamo Mat. 17:13

da'a nomparasaya! Sakuyapa kasaena Aku kana mosanggani ante komi? Sakuyapa kasaena Aku kana mosabara ri ja'i komi? Keni wemaimo ngana etu!»

20 Pade niken i iramo ngana etu ri ja'i Yesus. Tempo seta riaro ngana etu nanggita Yesus, kaliu-liu i'a nombabaga ngana etu sampe i'a nadungga pade notinggaduli ante ngangana nawura.

21 Pade nekutanamo Yesus ka uma nu ngana etu, «Sakuyamo kasaena anamu nombarasai iwe'i?»

Nesonomo umana, «Da nggari kakedina.

22 Nadea ngganimo i'a nipakadungga seta etu riaro apu atau ri ue ala mompatesi i'a. Tapi ane Komi mamala mowia bara nuapa ka anaku e'i, potowemo kami! Tulungimo kami!»

23 Nangulimo Yesus ka i'a, «Pangulimu, <Ane Komi mamala mowia bara nuapa.> Tapi kakonona pura-pura namala majadi ka tau to nomparasaya!»

24 Kaliu-liu nongaremo uma nu ngana etu, «Aku nomparasayamo! Tapi tulungimo, pomparasayaku e'i danalente!»

25 Sangga Yesus nanggita tau dea nangowa nantatiku I'a, niparentana seta etu iwe'i: «Palaimo iko, seta to nompakabobo pade nompakabongo ngana e'i! Palaimo iko pade ne'e mana mesua ri ja'ina!»

26 Nangepe etu nesuwumo seta etu ante nongare pade nombajuanaka mpakagai ngana etu. Iwetu seta nesuwu nggari ja'ina ngana etu ewa tomate, sampe tau dea nanguli, «Namatemo i'a.»

27 Tapi Yesus nanjoko pale ngana etu pade nantulungi i'a nembangu. Pade nembangumo ngana etu.

28 Tempo Yesus nesua raranjapo ante anaguruna, nekutanamo ira ka I'a, «Pue, iwenu sampe kami da'a nompakule nompopalai seta etu pani'a?»

29 Nesonomo Yesus, «Seta ewa etu da'a namala rapopalai ante akala ntanina. Tapi aga ante posambaya.»

Yesus nombaboto sangganipa ewa kamatena banepia

Mat. 17:22-23; Luk. 9:43b-45

30 Naopu etu Yesus ante anaguruna nompalasi peto'o etu nompapola polumako ira noliu ri Bagia Galilea. Patuju Yesus ala ne'e ranjani ntau mpaka ri umba I'a,

31 sabana I'a nompatuduki anaguru-anaguruna. Nangulimo I'a ka ira, «Aku, Ana nu Manusia kana rawai ka baliku, pade Aku kana rapatesi ira. Tapi ri eo katolueona Aku kana matuwu bali.»

32 Tapi da'a ninjani anaguru Yesus patuju nu tesana etu, pade naekamo rara ira nompekutana batuana ri ja'ina.

Anaguru-anaguru Yesus nosinggarau isemana nggari tatongo ira to neliu nggalanga katuwuna

Mat. 18:1-5; Luk. 9:46-48

33 Naratamo ira ri ngata Kapernaum. Sangga nesuapa ira raranjapo nekutanamo Yesus ka anaguruna, «Nuapa to nippinggarau komi ri jala pani'a?»

34 Tapi ira aga nekalino sanggan, sabana ri jala pani'a ira nosinggarau ka isema to neliu nggalanga katuwuna nggari tatongo ira.

35 Nanggita etu Yesus nekatoko ri setu pade nipokiona anaguruna sampulu romba'a etu mpaka ri ja'ina. Pade niulina ka ira, «Isema-sema madota majadi to neliu nggalanga katuwuna i'a kana majadi to neliu nggaede nggari roana, pade i'a kana majadi batua nu roana pura-pura.»

36 Pade nialana samba'a ngana nggedi nikenina ri tatongo ira pura-pura. Pade nikalipuina ngana etu ante nanguli ka ira,

37 «Isema-sema nantarima samba'a ngana nggedi ewa ngana e'i riaro sangaku, i'a nantarima Aku. Pade isema-sema to nantarima Aku da'a aga Aku to nitarimana, tapi i'a wo'u nantarima Umaku to nompakau Aku.»

Tau da'a nangewa komi i'a roa komi
Luk. 9:49-50

38 Pade nangulimo Yohanes ka Yesus, «Guru, kami nanggita samba'a tau nompopalai seta ante kuasa nggari sanga Komi. Tau etu nitagi kami sabana i'a da'a topantuki kita.»

39 Tapi nangulimo Yesus, «Ne'e komi mombatagi i'a, sabana da'a ria tau to nompowia kabaraka ante kuasa nggari sangaku to namala manguli sinja'i Aku.

40 Isema-sema da'a nangewa kita, ira roata.

41 Aku mpu'u-mpu'u notesa ka komi, isema-sema mombawai ka komi ue inu sabana komi topantuki Kristus, natantumo i'a kana mombarata tambona banepia.

Ne'e mompakeni roamu mowia silaka pade ne'e mantuki dota raramu mowia silaka
Mat. 18:6-9; Luk. 17:1-2

42 Pade isema-sema mombabagiu samba'a ngana nggedi sampe i'a mana momparasaya, nabelopa ane saongu watu bete raso'o ri tambolona pade i'a ratajiaka riaru ntasi.

43 Ane palemu manggeni komi mowia silaka, tompomo palemu etu! Nabelopa komi mesua matuwu mabelo riaru suruga ante pale mapudu pade ratajiaka riaru naraka ante pale to maganana, etumo riaru apu to da'a ntoto ria kapaya-payana. [

44 Ri setu kaule da'a ria kamatena pade apu da'a ria kapaya-payana.]

45 Pade ane kadamu manggeni komi mowia silaka, tompomo kadamu etu! Nabelopa komi mesua matuwu mabelo riaru suruga ante kada mapudu pade ratajiaka riaru naraka ante kada to maganana. [

46 Ri setu kaule da'a ria kamatena pade apu da'a ria kapaya-payana.]

47 Pade ane matamu manggeni komi mowia silaka, su'i kaliakamo matamu etu! Nabelopa komi mesua matuwu mabelo riaru suruga ante momata sabingga pade ratajiaka riaru naraka ante mata to maganana.

48 Ri setu kaule da'a ria kamatena pade apu da'a ria kapaya-payana.

49 Butu mba'a tau pokaingguna kana rapakagasa riaru mpanggita Alatala ante apu [nasimbayu ewa pesomba nipakagasa ante gara.]⁹

50 Gara nabelo, tapi ane gara majadi nameli, iwenupa wo'u mompakapaga bali? Iwetu wo'u komi kana mompopokita belo riaru nggatuwumu, pade tunggai mosinggabelo ante roa ntanina.»

10

Pepatuduki Yesus ewa posompo porongo
Mat. 19:1-9; Luk. 16:18

1 Naopu etu Yesus nompalasi peto'o etu pade nalau mpaka ri Bagia Yudea bo bagia sambote Binangga Yordan. Ri setu nadea wo'u tau narata nantaguni I'a, pade ewa kabiasana Yesus nompatuduki ira.

2 Naria bara sakuya mba'a tau to Parisi narata ri ja'i Yesus ala mompesoba I'a. Nekutanamo ira ka Yesus, «Nantuki Atura-atura agamata mamala samba'a langgai mombasompo rongona besi?»

3 Nesonomo Yesus, «Nuapa to niparenta nabi Musa ka komi?»

4 Nesono ira, «Musa nompaloga posompo porongo ane langgai mombawai sura tala ka rongona besi.»

5 Nanguli wo'umo Yesus ka ira, «Atura etu nitulisi i Musa ka komi sabana nako'o gaga rara komi!

6 Tapi da'a iwetu ri lamba pamulana tempo Alatala nompajadi dunia. I'a nompajadi manusia langgai bo besi.

⁹ *pesomba nipakagasa ante gara*: Nantuki Atura-atura agama Yahudi pura-pura bau to nipesomba ka Alatala kana radika gara. Kitamo Im. 2:13, Kel. 30:35

7 Etumo sabana samba'a langgai kana mompalasi indo umana pade maroo ri ja'i rongona besi,
 8 pade ira romba'a kana majadi samba'a. Ira mana rauli romba'a, tapi damo samba'a.
 9 Sabana etu nuapa to nipakasaongu Alatala, ne'e rapopoga'a manusia!»

10 Tempo ira raranjapomo nekutana wo'umo anaguru Yesus ka I'a ewa papatudukina pani'a.
 11 Nangulimo Yesus ka ira, «Isema-sema mombasompo rongona besi pade momporongo besi ntanina, i'a nireke nebualo.
 12 Pade ane besi moga'a ante rongona langgai pade raporongo langgai ntanina, i'a wo'u nireke nebualo.»

Yesus nombagane ngana-ngana
 Mat. 19:13-15; Luk. 18:15-17

13 Naopu etu naratamo tau-tau nanggeni ana-ana ira mpaka ri ja'i Yesus ala I'a mombadika palena ri koro ira pade mombagane ira. Tapi anaguru-anaguruna nanggarau tau-tau etu.
 14 Nanggita etu naraumo rara Yesus sampe niulina ka anaguru-anaguruna, «Pakambamo ngana-ngana etu marata ri ja'iku! Ne'e ratagi ira, sabana aga tau-tau to noinggu ewa ngana-ngana e'i to masipato majadi todea riaru Poparenta nu Alatala.
 15 Aku mpu'u-mpu'u notesa ka komi, da'a ria samba'a tau namala majadi todea riaru Poparenta nu Alatala ane i'a da'a mekou ri ja'i Alatala nasimbayu ewa ngana-ngana e'i.»
 16 Pade nisalungguna ngana-ngana etu samba'a bo samba'a pade nidikana palena ri koro ira ala mombagane ira.

Nakaja mpu'u tau nakalumana majadi todea riaru Poparenta nu Alatala
 Mat. 19:16-30; Luk. 18:18-30

17 Tempo Yesus nompapola polumakona, naria samba'a tau nangowa nantotoaka I'a. Nekadedemo i'a ri ngayo Yesus ante nanguli, «Guru to nabelona, nuapa masipato kupowia ala mamala matuwu mabelo sampe ri kasae-saena?»

18 Nesonomo Yesus, «Nokuya komi nanguli Aku nabelo? Da'a ria tau ntanina to nabelona, aga Pue Alatala.
 19 Natantu ninjanimu parenta-parenta Alatala to nanguli, «Ne'e mepatesi, ne'e mogau sala ante tau da'a rongomu mboto, ne'e mangangga, ne'e modawa ri ngayo ntopotangara, ne'e mebagiu, pade bilamo indo umamu.» »

20 Nesonomo tau etu, «Guru, parenta-parenta etu nitukiku puramo nggari kakediku.»

21 Pade Yesus nombalele mata ntau etu ante towena, pade niulina ka i'a, «Aga sangelepa to nakura ri ja'imu. Kalau pobalu puramo kakalumanamu pade palelemo doina ka tau-tau nakasiasi ala murata kakalumana ri suruga. Maopu etu kamai, tukimo Aku.»

22 Nangepe tesa Yesus etu nabalimo lenje ntau etu sampe nalaimo i'a ante nasusa rara, sabana nadea mpu'u kakalumanana.

23 Naopu etu Yesus nanggita anaguru-anaguruna to nantalili I'a pade niulina ka ira, «Nakaja mpu'u tau nakalumana majadi todea riaru Poparenta nu Alatala.»
 24 Nangepe etu natekaja mpu'umo rara anaguruna etu. Tapi Yesus nompapola tesana ka ira, «Ana-anaku, nakaja mpu'u tau majadi todea riaru Poparenta nu Alatala.
 25 Nagampapa saongu binata to nabetena ewa unta mesua ri bolo jaru pade samba'a tau nakalumana majadi todea riaru Poparenta nu Alatala.»

26 Nangepe etu nantambai naingu anaguruna sampe ira nosimpekutana samba'a bo samba'a, «Ane iwetu natantumo da'a ria samba'a tau to mamala rapakasalama!»¹⁰

27 Yesus nombalele mata ira pade nanguli, «Ane aga nggari manusia, natantu da'a

¹⁰ *nantantumo da'a ria samba'a tau to mamala rapakasalama*: Nantuki tau to Yahudi ane samba'a tau nakalumana etu tandaina i'a nikonoa Alatala pade natantumo rapakasalama. Etu sampe ira natekaja nangepe tesa Yesus e'i.

mamala majadi. Tapi da'a iwetu ante Alatala. Sabana pura-pura mamala majadi ane I'a madota.»

28 Naopu etu nangulimo i Petrus ka Yesus, «Kita we'i, Pue. Kami e'i nompalasi pura-pura nuapa to naria ri ja'i kami pade nantuki Komi.»

29 Nangulimo Yesus, «Aku mpu'u-mpu'u notesa ka komi, butu mba'a tau to nompalasi saponi bara sampesuwuna, bara indo umana, bara anana bo tinaluna sabana nantuki Aku bo nanggeni Kareba Belo,

30 natantumo i'a kana mombarata bali riaru nggatuwuna we'i-we'i satu nggani kadeana nggari nuapa to nipalasi. I'a kana mombarata sapo bo sampesuwu langgai ante sampesuwu besi, indo, ngana-ngana bo tinalu, nau ante pepandasa. Pade ri tempo nggapurina i'a kana mombarata katuwuna mabelo sampe ri kasae-saena.

31 Tapi nadea tau to nalanga katuwuna we'i-we'i kana majadi tau to naede katuwuna banepia. Pade nadea wo'u tau to naede katuwuna we'i-we'i kana majadi tau to nalanga katuwuna banepia.»

Yesus nombaboto katolonganina ewa jala nggamatena banepia
Mat. 20:17-19; Luk. 18:31-34

32 Tempo Yesus ante anaguruna riaru mpolumako ira mpaka ri ngata Yerusalem Yesus nolumako njamba'ana ri koluna. Nakini-kini rara anaguruna nompekiri nuapa majadi ri ja'i Yesus ri setu, pade naeka wo'u rara tau-tau ntanina to nantuki ira nggari purina. Pade sangganipa Yesus nompokio anaguruna sampulu romba'a ri ja'ina pade nompamulamo I'a notesa ka ira nuapa to majadi ri ja'ina.

33 Niulina, «Eemo mpakabelo-belo! We'i-we'i kita mantende mpaka ri ngata Yerusalem. Ri setu Aku, Ana nu Manusia kana rapobalu ka balengga-balengga topanggeni agama bo guru-guru agama. Pade ira mompakatantu riaru potangara Aku kana rapatesi. Pade Aku kana rawai ka tau-tau da'a to Yahudi,

34 pade Aku kana rapongei-gei bo ratailu ira. Pade Aku kana raporo ira mpakandasa pade kaopuna rapatesi ira. Tapi ri eo katolueona Aku kana matuwu bali.»

Pomperapi Yakobus bo Yohanes
Mat. 20:20-28

35 Naopu etu Yakobus bo Yohanes ana i Zebedeus nompakamosu Yesus pade nanguli, «Guru, nisarumaka kami nuapa raperapi kami kana rapoiyo Komi.»

36 Nekutana Yesus ka ira, «Nuapa to nipodota komi ala kupowia ka komi?»

37 Nesonomo ira, «Palogamo kami mekatoko moparenta mpasanggeni-nggani ante Komi tempo Komi moparenta ante nakuasa ewa magau banepia, samba'a ri pangganamu pade samba'a ri panggeimu.»

38 Nangulimo Yesus ka ira, «Da'a ninjani komi nuapa to niperapi komi etu. Iwenumo? Rapakule komi manggolo pepandasa nasimbayu ewa pepandasa to rapawela ka Aku, pade manta'amaka kasusa ewa to kurasai banepia?»

39 Nesonomo ira, «Rapakule!»

Pade nangulimo Yesus ka ira, «Natantumo komi kana manggolo pepandasa nasimbayu ewa pepandasa to rapawela ka Aku, pade komi kana mombarasai nuapa to kurasai.

40 Tapi da'a Aku to nakuasa mompakatantu isema masipato mekatoko ri pangganaku bara ri panggeiku. Peto'o etu bagia ira to nipakatantu Umakumo.»

41 Nangepe nuapa to niperapi Yakobus bo Yohanes sampulu mba'a anaguru Yesus ntanina nanggarau ira romba'a etu.

42 Tapi Yesus nompokio ira pura-pura mpaka ri ja'ina pade niulina ka ira, «Ninjani komi mbotomo ira to nireke topoparenta tau-tau da'a nosinjani ante Alatala nabiasa nomporenta todea ira ante nasombo. Pade topanggeniaka-topanggeniaka ira nompandasa todea ira.

43 Tapi da'a masipato komi moinggu iwetu! Kakonona kana iwe'i: Isema-sema nggari tatongo komi to madota malanga panggana i'a etu kana majadi topantulungi roana.

44 Pade isema-sema to madota majadi to nalanga katuwuna kana majadi batua komi pura-pura.

45 Sabana Aku, Ana nu Manusia mboto da'a narata ri dunia e'i ala ratulungi ntau tapi ala mantulungi tau, pade ala mombawai koroku rapatesi mantolo silaka-silaka ntau dea.»

Yesus nompakabelo mata i Bartimeus
Mat. 20:29-34; Luk. 18:35-43

46 Naopu etu naratamo Yesus ante anaguruna ri ngata Yerikho. Tempo Yesus nesuwu nggari ngata etu nosangani ante anaguruna bo nadea mpu'u tau ntanina, ri setu naria samba'a tobuoro nosanga ka i Bartimeus, ana i Timeus, nekatoko nerapi-rapi ri wiwi jala.

47 Tempo i'a nangepe lele Yesus to Nazaret noliu ri setu, nompamulamo i'a nongare, «Yesus, Muli i Daud, potowemo aku e'!»

48 Nadea tau nangontiaka i'a ante nanguli, «Ne'e makanano! Pekalinomo iko!»
Tapi i'a aga nantambai nongare ante suara to namangga, «Muli i Daud, potowemo aku!»

49 Nangepe etu nenontomo Yesus, pade niulina ka tau ri setu, «Pokiomo i'a wemai.»
Jadi ira nompokio tobuoro etu ante nanguli, «Pakaroo raramu! Pekanggoremo. I'a nompokio iko.»

50 Nangepe etu nipalewanamo buyana pade nompari-mpari nekanggore nalau nantotoaka Yesus.

51 Pade nekutanamo Yesus ka i'a, «Nuapa to mupodota kupowia ka iko?»
Nesonomo tobuoro etu, «Guru, to nipodotaku ala matakuku mamala mekita!»

52 Pade nangulimo Yesus ka i'a, «Panjilimo. Nabelomo matamu sabana iko nompasaya.»
Kaliu-liu nabelomo mata ntoburo etu. Pade nalaumo i'a nantuki Yesus riaru mpolumakona.

11

Yesus nitomunaka pue ngata Yerusalem ewa samba'a magau
Mat. 21:1-9; Luk. 19:28-38; Yoh. 12:12-15

1 Tempo Yesus ante anaguruna namosumo ante ngata Yerusalem, naratamo ira ri ngata Betfage bo ngata Betania ri kente nu Bulu Zaitun. Ri setu Yesus nompakau romba'a anaguruna mokolu ka I'a.

2 Niulina ka ira, «Kalaumo komi mpaka ri ngata to namosuna ri setu. Tempona komi mesua rara ngata komi kana mombarata saongu ana keledai nitataka ri setu to da'apa sanggani nipesawi ntau. Wolemo ana keledai etu nggari potatakana pade umbumo wemai.

3 Pade ane maria tau mompekutana komi, «Nokuya komi nombawole ana keledai etu?» uli ka tau etu, «Pue paraluu mompake ana keledai e'i. Damo rapopanjinina ngina.»

4 Jadi nalaumo ira romba'a etu pade nirata ira mpu'u saongu ana keledai nitataka ri wiwi jala namosu pewobo saongu sapo. Pade niwole iramo ana keledai etu nggari potatakana.

5 Tempo etu nekutanamo bara sakuya mba'a tau to nenggore ri setu, «Nuapa nipowia komi? Nokuya komi nombawole ana keledai etu?»

6 Pade nesonomo ira nantuki tewai to nitesa Yesus ka ira. Nangepe etu tau-tau etu nompaloga ira nanggeni ana keledai nggari setu.

7 Jadi ana keledai etu niumbu ira mpaka ri ja'i Yesus. Narata ri setu nilampi ira ante buya, pade nesawimo Yesus ri bungguna.

8 Nadea tau ri setu nombajini buya ira ri jala pade naria wo'u tau nombatale rangga-rangga kayu nggedi to nanggamatana to niala ira nggari pampa ewa tandaina pebila ira ka Yesus.

9 Pade nongare-ngaremo pura-pura tau, nabeloka ira ri koluna, nabeloka ira ri purina. Ira nanguli,

«Ratoyata Alatala!

Perapi Pue mombagane Magau to narata niposumba Alatala!¹¹

10 Perapi Pue mombagane poparenta nu Magau to maratana,

¹¹ *Magau to narata niposumba Alatala*: etumo Magau to Mompakasalama to nijanji Alatala, i Pue Yesus

etumo poparenta Muli nu umata Magau Daud.
Ratoiyata Alatala ri suruga!»

11 Tempo Yesus nesua riara ngata Yerusalem nalaumo I'a mpaka ri Sapo Mpepue nanggita pura-pura nuapa to naria ri setu. Naopu etu nalaimo I'a mpaka ri ngata Betania nosanggani ante anaguruna sampulu romba'a sabana nanguwiamo.

Yesus nombanjiaka sampu'u kayu ara
Mat. 21:18-19

12 Kaeona mpadondo tempo ira nalai nggari ngata Betania, naoromo ta'i Yesus.

13 Pade da nggawao I'a nanggita sampu'u kayu ara to noroyamo. Jadi nalaumo I'a nompakamosu kayu etu ala manggita ane maria wuana. Tapi tempona I'a narata ri setu da'a ria kamba saongu wuana niratana aga tawana bayangi, sabana da'apa tempo mpowuana.

14 Pade I'a nombanjiaka kayu ara etu ante nanguli, «Ne'e mana maria wuamu rakoni ntau sampe ri kasae-saena.» Tesana etu niepe anaguruna.

Yesus nompopalai topotomu nggariara Sapo Mpepue
Mat. 21:12-13; Luk. 19:45-48; Yoh. 2:13-16

15 Pade naratamo ira ri ngata Yerusalem. Sangga naratapa ri setu nesuamo Yesus riara Sapo Mpepue, pade nompamulamo I'a nompopalai topotomu nggari setu. Nisumbolinakana puramo meja-meja ntoposinjula doi bo kadera-kadera ntopobalu tonji banggebodo.

16 Pade da'a nipalogana kamba samba'a manggeni mbara-mbara nantuki jala moliu ri lalowo Sapo Mpepue.

17 Pade nipatudukina tau dea ri setu iwe'i: «Riara Buku Nagasa naria nitulisi iwe'i: <Sapoku kana rauli sapo mposambaya tau njumangata.>¹² Tapi komi e'i nompajadi Sapo Mpepue e'i peto'o parampo!»

18 Balengga-balengga topanggeni agama bo guru-guru agama nangepe kajadia etu. Jadi nompamulamo ira mangelo jala mompatesi Yesus sabana naekamo rara ira ri ja'ina nanggita pura-pura tau nogumaa nangepe pepatudukina.

19 Tempo ntoro mawengimo nalai wo'umo Yesus ante anaguruna nggariara ngata etu.

Pepatuduki Yesus ewa kayu ara to nijanjiakana
Mat. 21:20-22

20 Kaeona mpadondo tempo ira noliu ri jala mpaka ri Yerusalem nikita ira kayu ara to nijanjiaka Yesus yowi. Nangau puramo sampe ri kalena.

21 Pade natetoramo rara i Petrus kajadia yowi ante kayu etu. Niulina ka Yesus, «Kitamo, Guru. Kayu ara to nijanjiaka Komi yowi nangau puramo!»

22 Nangulimo Yesus, «Parasayamo ri ja'i Alatala!

23 Aku mpu'u-mpu'u notesa ka komi, komi mamala manguli ka bulu e'i, <Polinjamo, potingganawu riara ntasi.> Pade etu kana majadi ane komi da'a morompenga pekirimu pade manjarumaka nuapa to niuli komi etu kana majadi.

24 Sabana etu kuuli ka komi, ane komi merapi sangele ka Pue Alatala, parasayamo pomperapimu etu kana madupa, pade nuapa to niperapimu etu kana ratarima komi.

25 Pade tempo komi mekanggore mosambaya ane maria kasala roamu ri ja'imu, ampungi ntani ruru i'a ala Umamu to naria ri suruga wo'u mombaampungi sala-salamu. [

26 Tapi ane komi da'a mombaampungi roamu, natantumo Umamu ri suruga wo'u da'a mombaampungi sala-salamu.»]

Topanggeniaka nto Yahudi nekutana ewa kuasa Yesus
Mat. 21:23-27; Luk. 20:1-8

27 Pade narata wo'umo ira ri ngata Yerusalem. Tempona Yesus nolumako ri lalowo Sapo Mpepue naratamo balengga-balengga topanggeni agama, guru-guru agama bo totu'a-

¹² Yes. 56:7, Yer. 7:11

totu'a nto Yahudi.

28 Nekutanamo ira ka I'a, «Ante kuasa nggari umba Komi nompopalai topotomu nggari Sapo Mpepue yowi? Isema nombawai kuasa etu ka Komi?»

29 Nesonomo Yesus, «Naria wo'u sangaya kupekutana ka komi ntani ruru. Sonomo pompekutanaku e'i pade Aku manguli ka komi ante kuasa nggari umba Aku nowia mpengaya-ngaya etu.

30 Ulimo ka Aku, isema nombawai kuasa ka Yohanes Topediu nombadiu tau? Alatala atau manusia?»

31 Pade nosimpekutanamo ira samba'a bo samba'a, «Iwenu kita mombasono I'a? Ane kita manguli kuasa Yohanes nggari ja'i Alatala natantumo I'a kana manguli ka kita iwe'i: <Ane iwetu nokuya komi da'a nomparasaya Yohanes?»

32 Tapi da'a mamala kita manguli kuasa Yohanes nggari ja'i manusia!» Niuli ira iwetu apa naeka ira ri ja'i ntau dea, sabana tau dea nomparasaya Yohanes mpu'u-mpu'u samba'a nabi.

33 Jadi nesonomo ira ka Yesus, «Da'a ninjani kami nggari umba kuasana.»

Pade nangulimo Yesus ka ira, «Ane iwetu da'a wo'u kutesa ka komi ante kuasa nggari umba Aku nowia mpengele-ngele etu.»

12

Porapa ewa topokarajaa tinalu to naja'a

Mat. 21:33-46; Luk. 20:9-19

1 Pade nompamulamo Yesus notesa ka topanggeniaka-topanggeniaka nto Yahudi ante porapa. Niulina, «Naria samba'a tau nombatuja anggur ri tinaluna. Naopu etu tinalu etu niwala ntikuna, pade nikaena saongu lowu peto'o parewa rapompea wua anggur. Nikawiana wo'u sou panggatono tinalu. Naopu etu nipajana tinalu etu ka bara sakuya mba'a topokarajaa pade nalaimo i'a mpaka ri ngata ntanina.

2 Sangga naratapa tempona mompui wua anggur nipakaunamo samba'a batua malau mpaka ri ja'i topokarajaa tinaluna etu ala mantarima bagiana nggari asele tinalu nipotuja anggur etu.

3 Tapi ira aga nombasoko batua etu pade nombaboba i'a pade nompakau i'a manjili ante pale ntoya.

4 Naopu etu pue ntinalu nompakau wo'umo samba'a batua ntanina mpaka ri ja'i topokarajaa tinalu. Tapi i'a wo'u niboba ira sampe nabela balenggana, pade i'a mpu'u-mpu'u nipakaeya ira.

5 Naliu etu pue ntinalu etu nompakau wo'umo batua to santanina mpaka ri ja'i topokarajaa tinalu. Tapi i'a aga nipatesi ira. Pade iwetu wo'u to nipowia ira ante batua-batua ntanina. Naria to niboba ira, pade naria ntanina to nipatesi ira.

6 Kaopuna naboli damo samba'a lau ri ja'i pue ntinalu, etumo anana mboto to nipotowena. Anana etu nipakauna mpaka ri ja'i ntopokarajaa tinalu. Nipekirina, <Natantumo ira kana mekou ri ja'i anaku mboto.>

7 Tapi iwetu nanggita ana nu pue ntinalu etu, nangulimo topokarajaa etu samba'a bo samba'a, <Kitamo! Etumo ana pue ntinalu to majadi pue ntinalu banepia. Kamaimo kita mompatesi i'a ala tinalu e'i raalata majadi bagiata.>

8 Jadi nisoko iramo ana pue ntinalu etu pade i'a nipatesi ira, pade watabakuna nitajiaka ira ri sawaliku tinalu etu.»

9 Pade nekutanamo Yesus ka topanggeniaka nto Yahudi etu, «Jadi nuapa to rapowia pue ntinalu etu? Natantumo i'a kana marata mompatesi topokarajaa tinalu etu pade mombapaja tinalu etu ka tau-tau ntanina.

10 Natantumo nibasa komi tesa riaru Buku Nagasa to nanguli iwe'i:

<Watu to nitajiaka ntopowia sapo

watu etumo to najadi palo mpondasi to neliu nggaroso.

11 Etu nipowia i Pue,

sangele powia to nipogumaa matata.> »

(Mzm. 118:22-23)

12 Nangepe etu topanggeniaka nto Yahudi etu nompasimbuku mangelo jala manjoko Yesus, sabana ninjani ira porapa Yesus etu nipawela ka ira. Tapi ira naeka ka tau dea. Jadi nalaimo ira nompalasi I'a.

To Parisi nompasimbuku mangelo kasala tesa Yesus ante nekutana ewa mombabayari balasitee
Mat. 22:15-22; Luk. 20:20-26

13 Naopu etu topanggeniaka-topanggeniaka nto Yahudi etu nompakau bara sakuya mba'a to Parisi ante bara sakuya mba'a anabua Magau Herodes malau mangelo kasala tesa Yesus.

14 Sangga naratapa ira ri ja'i Yesus nangulimo ira, «Guru, ninjani kami Komi samba'a tau to nanoana. Komi da'a ntoto naeka ka isema-sema sabana Komi da'a nompoposisala manusia. Komi batena nompatuduki ante nanoto pokainggu nuapa to masipato riaru mpanggita Alatala. Jadi tulungi ulimo ka kami nantuki Atura-atura agama masipato mombabayari balasitee ka Magau Kaisar bara da'a?»

15 Masipato kami mombabayari etu bara da'a?»

Tapi ninjani Yesus patuju ira aga mebagiu. Jadi niulina ka ira, «Nokuya komi mangelo kasala tesaku? Keni ka Aku wemai sampeka doi salaka ala kukita!»

16 Pade nikeni ira mpu'umo sampeka doi etu. Pade nekutanamo I'a ka ira, «Gambara ante sanga isema to naria ri doi e'i?»

Nesonomo ira, «Gambara ante sanga Magau Kaisar.»

17 Pade nangulimo Yesus ka ira, «Ane iwetu, waimo ka Magau Kaisar nuapa to masipato rawai ka Magau Kaisar, pade waimo ka Alatala nuapa to masipato rawai ka Alatala!» Nangepe pesono Yesus etu, nogumaamo ira.

To Saduki nangelo kasala tesa Yesus ante pompekutana ewa tau matuwu bali banepia
Mat. 22:23-33; Luk. 20:27-40

18 Naopu etu naratamo bara sakuya mba'a tau to Saduki ri ja'i Yesus. Iramo tau-tau to Yahudi to nomparasaya tau namate da'a mana matuwu bali banepia. Jadi nekutanamo ira ka Yesus,

19 «Guru, nabi Musa nantulisi atura e'i ka kita: <Ane maria samba'a langgai norongo pade da'apa rongona noana namatemo i'a, sampesuwuna mboto kana momporongo baluna etu ala muli ira romba'a majadi muli sampesuwuna to namatena etu.>¹³

20 Naria ira nosampesuwu pitumba'a langgai bayangi. Ulumbuana norongomo, tapi da'apa ira njamboko noana namatemo i'a.

21 Pade tua'ina karomba'ana nomporongong baluna etu. Tapi da'apa ira noana i'a wo'u namate. Pade wa'a wo'u to najadi ante katolumba'ana

22 sampe ri kapapitumba'ana. Da'a ria samba'a ira nomboli ngana ka besi etu. Kaopuna besi etu wo'u namate.

23 Jadi to rapekutana kami ka Guru iwe'i: Tempona tau-tau namate matuwu bali banepia, besi etu rongong isema, sabana i'a niporongong ira pitumba'a?»

24 Nesonomo Yesus ka ira, «Nasalamo pompekiri komi sabana da'a ninjani komi isi Buku Nagasa pade da'a wo'u ninjani komi kuasa nu Alatala.

25 Tempo tau namate matuwu bali banepia, katuwu ira kana masimbayu ewa malaeka-malaeka ri suruga. Ira mana morongong bo mana raporongong.

26 Iwenumo? Da'apa nibasa komi nuapa to nitesa riaru Buku nabi Musa ewa tau namate matuwu bali? Ri ayat-ayat to nantesa kajadia ante santungong gumbu to najelana da'a nikoni nu apu, Alatala nanguli ka i Musa, <Akumong Alatala Abraham, Alatala Ishak bo Alatala Yakub.>¹⁴

27 Ninjanita Pue Alatala da'a Alatala ntau to namatena, tapi I'a Alatala ntau to natuwuna. Jadi nanotomong Abraham, Ishak bo Yakub mana namate. Nasalanjalamong pompekiri komi etu!»

Parenta Alatala to nelu nggapokona

¹³ Ul. 25:5

¹⁴ Kel. 3:6

Mat. 22:34-40; Luk. 10:25-28

28 Tempo etu naratamo samba'a guru agama ri ja'i Yesus. Niepenamo tesa Yesus ante tau-tau Saduki pani'a pade niepena pesono Yesus nabelo mpu'u. Jadi nekutanamo i'a ka Yesus, «Guru, parenta Alatala umbana to neliu nggapokona?»

29 Nesonomo Yesus, «To neliu nggapokona iwe'i: <Umba komi tau-tau to Israel, Pue Alatalata, Pueta samba'a lau.

30 Potowemo Pue Alatalamu ante mpu'u-mpu'u raramu, pade ante pura-pura katuwumu, pade ante pura-pura pekirimu, pade ante pura-pura karoso koromu.>¹⁵

31 Pade parenta karongelena iwe'i: <Potowemo sanggamanusiamu nasimbayu ewa komi nompotowe koromu mboto.>¹⁶ Da'a ria parenta ntanina to neliu nggapokona nggari ronge parenta etu.»

32 Pade nangulimo guru agama etu ka I'a, «Nakono mpu'u, Guru. Nakonomo tesa komi nanguli Alatala aga samba'a lau pade da'a ria to ntanina, aga I'a.

33 Pade ewa niuli komi manusia kana mompotowe Alatala ante mpu'u-mpu'u rarana, ante pura-pura pekirina pade ante pura-pura karoso korona. Pade masipato kita mompotowe sanggamanusiata ewa korota mboto. Etu neliu nggabelo nggari mombawai pesomba to nitunu bo pewai-pewai ntanina ka Alatala.»

34 Sangga nangepe guru agama etu notesa ante nanoto iwetu, nangulimo Yesus ka i'a, «Komi ntoramo najadi todea riara Poparenta nu Alatala.»

Nompamula nggari setu mana ria samba'a to nabiana nompekutana Yesus.

Posinggamosu Yesus ante Magau Daud

Mat. 22:41-46; Luk. 20:41-44

35 Tempo Yesus nopaguru ri Sapo Mpepue nekutanamo I'a ka tau dea ri setu, «Iwenu sampe guru-guru agama nanguli Magau to Mompakasalama aga muli i Daud?

36 Magau Daud mboto ante pekeniaka Nosa Nagasa nu Alatala nanguli iwe'i:

<Pue Alatala nanguli ka Pueku,

kamai pekatokomo ri sabingga ngganaku

sampe Aku mompowia pura-pura balimu mekou ri ja'imu.>

(Mzm. 110:1)

37 Jadi ane Magau to Mompakasalama niuli Daud Puena, iwenu sampe I'a nireke aga muli i Daud?»

Sangga nangepe tesa Yesus etu nadamba mpu'umo rara ntau dea.

Yesus nompopatora ala ne'e mantuki pokainggu guru-guru agama

Mat. 23:5-7; Luk. 20:45-47

38 Tempo Yesus nopaguru I'a nanguli, «Pakabelo-belo ala ne'e komi moinggu ewa guru-guru agama. Ira aga nompokono manjajo-njajo nompake baju ndoe ala rapogumaa ntau, pade ira aga nompokono rabila ntau riara potomu.

39 Ira aga nompokono mekatoko ri peto'o to nibilana riara sapo mpodade bara ri peto'o ntotu'a ri posusa.

40 Ira nombabagiu tobalu-tobalu besi ala mombarata sapo ira. Pade ira nantabuniaka pokainggu ira to naja'ana etu ante nosambaya nasae-sae. Etu sampe meliu nggatomo pesuku to rapawela ka ira banepia!»

Yesus nombatoiya samba'a besi tobalu to nakasiasi

Luk. 21:1-4

41 Naria sanggani Yesus nekatoko nantingayo peti mpesomba ri Sapo Mpepue pade nompariara iwenu tau mombasuaraka doi ira riara peti etu. Nadea tau to nasugina narata nombasuaraka doi ira riara peti mpesomba etu. Nadea mpu'u pewai ira.

42 Pade narata wo'u samba'a besi tobalu to nakasiasi mpu'u nombasuaraka doina rompeka

¹⁵ Ul. 6:4-5

¹⁶ Im. 19:18

doi tambaga to nakura mpu'u olina.

43 Pade Yesus nompokio anaguruna ri ja'ina, pade niulina ka ira, «Aku mpu'u-mpu'u notesa ka komi, besi tobalu to nakasiasi etumo to nadeapa pewaina nggari pura-pura tau ntanina to nombasuaraka doina riara peti mpesomba etu.

44 Sabana ira aga nombawai nggari labi nu doi ira, tapi tobalu besi etu nombawai ante kapepana. I'a nombawai pura-pura doi to naria ri ja'ina, etumo pura-pura katuwuna.»

13

PEPATUDUKI YESUS RI BULU ZAITUN TO NANTESA KAJADIA-KAJADIA BANEPIA (Pasal 13)

Yesus nombaboto kagero nu Sapo Mpepue banepia

Mat. 24:1-2; Luk. 21:5-6

1 Tempo Yesus nesuwu nggariara Sapo Mpepue, naria samba'a anaguruna nanguli ka I'a, «Guru, kitamo kagaya nu sapo-sapo e'! Kitamo karoso nu watu-watuna!»

2 Nangulimo Yesus ka i'a, «Nikitamu sapo-sapo to nagaya e'i. Tapi kana marata tempona banepia pura-pura to nikitamu e'i kana ragero sanggani sampe da'a mana maria watu e'i rapakamba mosisunju, nau kamba saongu. Pura-pura kana ragero.»

Yesus nombaboto kasusa bo kapari to marata tempo namosumo kaopu nu dunia

Mat. 24:3-14; Luk. 21:7-19

3 Pade nalaumo Yesus nekatoko ri Bulu Zaitun ri peto'o to nangingayo Sapo Mpepue. Ri setu i Petrus, Yakobus, Yohanes bo Andreas nompekutana I'a nggalino,

4 «Guru, tulungi uli ka kami nepia etu pura-pura majadi? Nuapa tandaina to mompakatantu namosumo kajadia to nitesa Komi pani'a?»

5 Nesonomo Yesus ka ira, «Pakabelo-belo ala ne'e komi rabagiu!

6 Sabana madea tau kana marata mompobalu sangaku. Ira manguli, «Akumo Magau to Mompakasalama!» Madea tau kana mamala rabagiu ira iwetu.

7 Ane komi mangepe wamba ntau mosipatesi bara mangepe lele ntau nosipatesi, ne'e komi maeka! Etu pura-pura kana majadi ntani ruru, tapi etu da'apa tandaina kaopu nu dunia.

8 Tempo etu tau-tau nggari sangatana kana mosibali ka tau-tau to sangatana, pade magau simbau magau wo'u kana mosiewa. Pade ri umba-umba ri dunia e'i kana maria lingu pade kana maria wo'u kamateoro. Tapi etu pura-pura aga kasusa pamulana, ewa ju'a besi ntoro moana.

9 Tapi komi e'i, pakabelo-belo, sabana komi kana rasoko pade rakeni rapangadu ri gayo ntopotangara agama. Komi kana raboba riara sapo mpodade pade komi kana rakeni ri gayo ntopoparenta-topoparenta bo magau-magau sabana komi nomparasaya Aku. Tempo etu komi kana motesa ka ira ewa Aku.

10 Pade Kareba Belo kana rapatolele ka pura-pura manusia ri dunia e'i ntani ruru.

11 Ane komi rasoko rakeni ratangara ne'e komi masusa pekirimu mompekiri nuapa pesono komi. Ane maratamo tempo etu tesamo nuapa to rawai ka komi, sabana da'a komi mboto to motesa tapi Nosa Nagasa nu Alatala.

12 Pade ri tempona etu wo'u kana maria tau nombawai sampesuwuna mboto rapatesi, pade maria totu'a nombawai anana mboto rapatesi. Ngana-ngana kana mangewa indo umana pade nombawai ira rapatesi.

13 Pade komi kana raporau rara ntau pura-pura sabana komi nomparasaya Aku. Tapi isema-sema to maroo momparasaya sampe ri kaopuna kana rapakasalama.»

Kasusa bo kapari to majadi da'apa I'a marata bali ri dunia

Mat. 24:15-28; Luk. 21:20-24

14 «Komi kana manggita to niuli <Kaja'ana to Mompakatantoru>¹⁷

mekanggore ri peto'o to da'a masipatona. Isema-sema nombabasa tesa e'i pekiri mbotomo batuana. Tempo etu majadi tau-tau to naria ri Bagia Yudea kana mangowa malai

¹⁷ <Kaja'ana to Mompakatantoru> niboto nabi Daniel nggaolu. Kitamo Dan. 9:27, 11:31, 12:11

mpaka ri buluna.

15 Ane tau-tau to nompamaya ka poiri ri bunggu nu sapona ne'e mana mesua mangala mbara-mbarana nggariara njapona.

16 Ane tau-tau ri tinaluna, ne'e mana ira manjili ri ngata mangala pakeana. Palaimo masasinta!

17 Ri eo etu mandasa mpu'umo besi-besi to matiana bo ira to danompatomi.

18 Pekakaimo ka Alatala ala etu da'a majadi tempo leni.

19 Sabana ri eo etu maja'a mpu'u kasusa bo kapari to mawela manusia. Da'apa sanggani najadi kasusa bo kapari ewa etu nompamula nggari lamba pamulana dunia nipajadi Alatala sampe we'i-we'i. Pade da'a mana ria kasusa bo kapari ewa etu ri tempo marata.

20 Ane Pue da'a masalisa mompakaopu kasusa bo kapari etu, natantumo da'a kamba samba'a mamala matuwu. Tapi nggari towe Alatala ka todea topomparasaya to nipelisina, tempona etu kana masalisa rapakaopuna.

21 Ri tempona etu ane maria tau manguli ka komi, <Kitamo! Ri se'imo Magau to

Mompakasalama,> bara manguli ka komi, <Ri setumo I'a,> ne'e raparasaya komi tesana.

22 Sabana kana meumba tau topodawa to mompangaku iramo Magau to Mompakasalama.

Pade meumba wo'u nabi-nabi topodawa. Ira pura-pura kana mompowia tandai-tandai to nipogumaa bo kabaraka-kabaraka ante patuju ane mamala mombabagiu tau-tau to nipelisi Alatala.

23 Tapi komi kana mainga sabana da'apa etu majadi nitesaku ka komi mamimo.»

Karata Ana nu Manusia bali ri dunia

Mat. 24:29-31; Luk. 21:25-28

24 «Ri tempo etu ane maopumo kasusa bo kapari etu mata eo kana majadi marumau pade wula mana mewanta.

25 Betu'e-betu'e kana manawu nggari langi pade kuasa-kuasa ri langi kana ragagoya pura.

26 Pade ri tempo etumo pura-pura manusia ri dunia kana manggita Aku, Ana nu Manusia mana'u riara kulimu ante kuasa bo karemeku to nipogumaa.

27 Pade Aku kana mompakau malaeka-malaekaku malau mompasiromu pura-pura tau to nipelisiku nggari patanjulapa dunia, nggari tampa nu langi marata ri tampa nu dunia.»

Pepatuduki nggari kayu ara

Mat. 24:32-36; Luk. 21:29-33

28 «Pariaramo pepatuduki nggari kayu ara. Ane komi manggita rangga-ranggana nompamula nangura pade nompamula noroya, natantu ninjani komi namosumo tempo eo mapane.

29 Iwetu wo'u ane komi manggita kajadia-kajadia to nitesaku pani'a, kana ranjani komi namosumo tempo karataku. Damo mompopea tempona.

30 Aku mpu'u-mpu'u notesa ka komi, kajadia-kajadia etu kana majadi da'apa pura-pura tau to natuwu we'i-we'i mamate.

31 Langi bo dunia kana malipo tapi tesaku kana maroo sampe ri kasae-saena.

32 Tapi eo bo tempo karataku etu da'a ria samba'a nangginjani, nabeloka malaeka-malaeka ri suruga, nabeloka Ana nu Alatala mboto. Aga Umaku mboto to nangginjanina.»

Kita kana mainga mompopea karata Yesus

33 «Jadi pakabelo-belo. Komi kana mainga sabana da'a ninjani komi nepia tempo karataku.

34 Karataku nasimbayu ewa porapa e'i: Naria samba'a tau to nalau mpaka ri ngata nakawao. Da'apa i'a nalau niwaina kuasa ka batua-batuana mombaurusi sapona. Butu mba'a niwaina bagona samba'a bo samba'a. Pade topangatonu pewobo nitewaina mainga mompopea karatana.

35 Jadi iwetu wo'u komi kana mainga mompopea karataku sabana da'a ninjani komi nepia Aku manjili, bara ulungguwiana bara ri tongo wengi bara kabobayana bara ri pebulu nu eo.

36 Komi kana mainga ala ane Aku marata ne'e-ne'e komi aga kurata maturu.

37 Nuapa to nitesaku ka komi, kutesa wo'u ka pura-pura tau. Komi kana mainga!»

14

Topanggeni agama Yahudi nonia mompatesi Yesus

Mat. 26:1-5; Luk. 22:1-2; Yoh. 11:45-53

1 Tempo etu damo rombengipa mawela Eo Bete Paska bo Posusa Roti Da'a Nidika Ragi.¹⁸ Balengga-balengga topanggeni agama Yahudi bo guru-guru agama danangelo jala manjoko Yesus nggalino pade mompatesi I'a.

2 Nangulimo ira, «Ne'e kita manjoko I'a tempo eo posusa etu, ala ne'e magado tau dea.»

Samba'a besi nantoli minya wongi ri balengga Yesus

Mat. 26:6-13; Yoh. 12:1-8

3 Naria sanggani Yesus ri ngata Betania ri sapo i Simon to naju'a bete bopia. Tempo I'a nekatoko nanggoni naratamo samba'a besi nanggeni saongu botolo to nipowia nggari watu naisi minya wongi to nasuli mpu'u olina to nipowia nggari kale to nawongi. Narata ri setu nipozona tambolo botolo etu pade nitolina minya wongi etu ri balengga Yesus.

4 Naria bara sakuya mba'a tau ri setu to narau rara nanggita powia nu besi etu. Notesamo ira samba'a bo samba'a, «Nokuya minya wongi etu nipakarugi sinja'i?»

5 Kakonona minya etu mamala rapobalu ante olina toluatu mpeka doi salaka¹⁹ pade doi etu mamala rawai ka tau-tau nakasiasi.» Pade ira nanggarau besi etu.

6 Tapi nangulimo Yesus ka ira, «Pakambamo i'a! Nokuya komi nompakasusa i'a? I'a nanggawia sangele to nabelona ri ja'iku.

7 Tau to nakasiasi bate-batena maria ri tatongo komi pade ira mamala ratulungi komi ri butu-butu tempo to nipodota komi. Tapi Aku e'i da'a batena mosanggani ante komi.

8 Besi e'i nompowia nuapa to namala nikawiana. I'a nombatoli minya wongi ri ja'iku ala mompakasadia koroku ratana banepia.

9 Aku mpu'u-mpu'u notesa ka komi, ri umba-umba ri dunia Kareba Belo rapatolele, powia nu besi e'i kana ratesa wo'u ala mombatora i'a.»

Yudas nompobalu Yesus ka balina

Mat. 26:14-16; Luk. 22:3-6

10 Naopu etu nalaumo Yudas Iskariot, samba'a nggari sampulu romba'a anaguru Yesus, mpaka ri ja'i balengga-balengga topanggeni agama ante patujuna nompobalu Yesus ka ira.

11 Tempo ira nangepe tesa Yudas, nadamba mpu'umo rara ira, pade ira nojanji mombawai doi ka i'a. Naopu etu nompamulamo Yudas nangelo loga to nabelona mombawai Yesus ka balina etu.

Yesus nanggoni panggoni Posusa Paska ante anaguruna

Mat. 26:17-25; Luk. 22:7-14, 21-23; Yoh. 13:21-30

12 Naratamo eo pamulana Posusa Roti Da'a Nidika Ragi, etumo tempo tau-tau to Yahudi nanjambale ana bimba rakoni ri Posusa Paska. Tempo etu naratamo anaguru Yesus nompekutana I'a, «Pue, ri umba peto'o mupokono rakalau kami mompakasadia panggoni Posusa Paska ka Komi?»

13 Nangepe etu I'a nompakau romba'a anaguruna ante tewai iwe'i: «Kalaumo komi mpaka ri ngata Yerusalem. Ri setu samba'a langgai manggeni gumba nu ue kana mosintomu ka komi. Tukimo i'a

14 mpaka ri sapo to rakalauna, pade ulimo ka pue njapo ri setu, <Iwe'imo tewai Guru ka kami: Ri umba tombi to nipakasadia ka Aku manggoni panggoni Posusa Paska ante anaguruku?»

15 Pade pue njapo etu kana mompopokita ka komi saongu tombi bete ri kalangana nagana ante parewana. Ri setumo rapompakasadia panggoni Posusa Paska ka kita.»

16 Pade nalaumo romba'a anaguruna etu nesua rara ngata. Pade to nirata ira ri setu nasimbayu pura ewa nuapa to niuli Yesus ka ira. Pade nipakasadia iramo panggoni Posusa Paska etu.

¹⁸ *Posusa Roti Da'a Nidika Ragi*: etumo posusa mombatora tempo Alatala da'a nompatesi ana ulumbua nto Yahudi ri tana Masir. Kitamo Kel. pasal 12

¹⁹ *toluatu mpeka doi salaka*: etumo gaji samba'a sampae kasaena

17 Sangga nawengipa naratamo Yesus ante sampulu romba'a anaguruna etu.

18 Tempona ira nekatoko nanggoni, nangulimo Yesus ka ira, «Aku mpu'u-mpu'u notesa ka komi, samba'a nggari tatongo komi to nanggoni mpasangani-nggani ante Aku kana mompobalu Aku ka baliku.»

19 Nangepe etu nasusa mpu'umo rara ira, pade nekutanamo ira ka Yesus samba'a bo samba'a, «Pue, da'a aku e'i to nipatuju Komi?»

20 Nangulimo I'a ka ira, «I'amo samba'a nggari komi sampulu romba'a e'i to mombatome roti riaru tubu mpasangani-nggani ante Aku.

21 Aku, Ana nu Manusia kana mamate ewa to nitulisi riaru Buku Nagasa. Tapi mandasa mpu'u tau to mompobalu Aku etu! Nabelopa ane tau etu da'a niote ri dunia.»

Yesus nompakatantu ada posusa mombatora I'a

Mat. 26:26-29; Luk. 22:15-20; 1Kor. 11:23-25

22 Tempona ira nanggoni Yesus nangala saongu roti pade nanguli tarima kasi ka Alatala. Naopu etu nibingga-binggana roti etu pade niwaina ka ira ante nanguli, «Alamo roti e'i. E'imo koro batak.»

23 Naopupa etu nialana wo'umo saongu sanggiri panginu pade niulina tarima kasi ka Pue Alatala. Naopu etu niwaina ka ira pade ira pura-pura nanginu nggari sanggiri panginu etu. 24 Pade niulina wo'umo ka ira, «E'imo leiku to rapatiti ka tau dea ngina ala mompakaasa pojanji Alatala ante manusia.

25 Aku mpu'u-mpu'u notesa ka komi, nompamula we'i-we'i Aku mana manginu anggur sampe marata tempona banepia Aku manginu anggur to nabouna riaru Poparenta nu Alatala.»

Yesus nombaboto i Petrus kana mombasapu I'a

Mat. 26:30-35; Luk. 22:31-34; Yoh. 13:36-38

26 Pade naopupa ira nodade nombatoiya Alatala nalaimo ira mpaka ri Bulu Zaitun.

27 Nangulimo Yesus ka ira, «Komi pura-pura kana mokanggaura momparasaya Aku, sabana naria Tesa nu Alatala to nitulisi riaru Buku Nagasa iwe'i:

<Aku kana mompatesi topoewu sampe bimba-bimbana mosimpotatare.>
(Za. 13:7)

28 Tapi tempo Aku matuwu bali Aku mokolu ka komi mpaka ri Bagia Galilea.»

29 Nangepe etu nangulimo i Petrus, «Naupa ira pura-pura mokanggaura momparasaya aku e'i da'a!»

30 Tapi nangulimo Yesus ka i'a, «Aku mpu'u-mpu'u notesa ka iko, wengina e'i wo'u da'apa magana ronggani manu mora'o tolungganimo iko mombasapu Aku.»

31 Tapi i Petrus nantambai kabiana nanguli, «Nau aku mamate mpasangani ante Komi aku da'a ntoto mombasapu Komi!» Pade iwetu wo'u to niuli pura-pura anaguruna ntanina.

Yesus nosambaya ri Bulu Zaitun

Mat. 26:36-46; Luk. 22:39-46

32 Pade naratamo ira ri saongu peto'o nosanga ka Getsemani. Narata ri setu nangulimo Yesus ka anaguruna, «Pekatokomo ri se'i tempo Aku malau mosambaya.»

33 Pade nikenina i Petrus, Yakobus bo Yohanes napola sakedi mpasangani-nggani. Pade nompamulamo Yesus nasusa bo nawiora mpu'u rarana.

34 Niulina ka ira tolumba'a, «Nasusa mpu'umo raraku, ewa mamate nirasaiku! Popeamo Aku ri se'i pade mainga-inga.»

35 Pade napolamo Yesus sakedi. Notimbakotumo I'a nekadede sampe ri tana pade nosambaya ka Umana Alatala ala ane mamala I'a makabasaka nggari kasusa bo kapari to marata ri ja'ina etu.

36 Niulina, «Uma, O, Umaku! Da'a ria to da'a namala mupowia. Ane mamala

pakakawaomo nggari ja'iku kasusa bo kapari e'! Tapi ne'e dotaku majadi, aga dotamu mboto.»

37 Naopu etu nanjilimo Yesus ri ja'i anaguruna tolumba'a etu. Niratana ira pura-pura napisi. Pade niulina ka i Simon Petrus, «Simon, iwenumo? Napisimo iko? Da'a nipakulemu mosanggani ka Aku nau aga sajaa?

38 Komi kana mainga bo mosambaya ala ne'e komi mawela pesoba! Riara nta'imu naria dota mompowia to nabelona, tapi koromu da'a nompakule.»

39 Pade nalau wo'umo Yesus nosambaya ewa posambayana pani'a.

40 Naopu etu narata wo'umo I'a ri ja'i anaguruna. Niratana ira aga napisi wo'umo sabana naluru mpu'u mata ira. Mana ninjani ira nuapa to rauli ira ka I'a.

41 Tempo Yesus natingguli ri ja'i ira katolungganina, niulina ka ira, «Iwenumo? Danapisi bo nangosaraka komi? Naganamo! Naratamo tempona Aku, Ana nu Manusia rawai riara mpale tau-tau nasilaka.

42 Pembangumo! Kitamo! Naratamo tau to nompobalu Aku! Kamaimo kita mantomunaka i'a!»

Yesus nisoko

Mat. 26:47-56; Luk. 22:47-53; Yoh. 18:3-11

43 Tempona Yesus danotesa, naratamo Yudas samba'a nggari sampulu romba'a anaguruna etu nituki ntau dea to nanggeni guma bo pato. Ira nipakau balengga-balengga topanggeni agama, guru-guru agama bo totu'a-totu'a nto Yahudi.

44 Da'apa ira nomai Yudas nompakatantu ka ira tandaina ala ranjani ira ri umbana Yesus. Niulina, «Isema ngina kueki, etumo I'a. Soko komimo I'a pade keni I'a nggari setu ante rajagai mpakabelo-belo.»

45 Sangga naratapa Yudas ri setu i'a kaliu-liu nompakamosu Yesus pade nanguli, «Tabe, Guru!» Pade niekina Yesus.

46 Naopu etu ira to nikeni Yudas nompakamosu Yesus pade nanjoko I'a.

47 Nanggita etu samba'a nggari anaguru Yesus to nenggore ri setu nangosu gumana nantimbe batua nu Balengga Topanggeni Agama sampe napudu talingana.

48 Nangulimo Yesus ka tau dea etu, «Iwenumo? Niuli komi Aku e'i samba'a parampo sampe komi kana marata ante guma bo pato manjoko Aku?

49 Kakonona eo-eo Aku naria ri tatongo komi nopaguru ri Sapo Mpepue. Nokuya komi da'a nanjoko Aku ri setu? Tapi etu kana majadi ala madupa tesa to nitulisi riara Buku Nagasa.»

50 Naopu etu pura-pura anaguruna nangowa nompalasi Yesus.

51 Naria samba'a kabilasa aga sabala lau buya ri korona nantuki puri Yesus. I'a nisoko ntau ri setu,

52 tapi i'a nombawonju buyana pade nalai ante nelaya.

Yesus nikeni ri ngayo Polibu Bete Agama nto Yahudi

Mat. 26:57-68; Luk. 22:54-55, 63-71; Yoh. 18:12-14, 19-24

53 Pade Yesus nikeni ira mpaka ri ngayo Balengga Topanggeni Agama. Ri setu pura-pura balengga topanggeni agama, totu'a-totu'a nto Yahudi bo guru-guru agama nasiromu nolibu.

54 Petrus nantuki Yesus nggawao sampe narata ri lalowo sapo nu Balengga Topanggeni Agama. Narata ri setu nekatokomo i'a noneru mpasanggani-nggani ante topojava-topojava.

55 Tempo etu balengga-balengga topanggeni agama ante pura-pura Topolibu Bete Agama nto Yahudi etu nompasimbuku mangelo tau mompakanoto kasala Yesus ala I'a mamala rasuku mamate. Tapi da'a ntoto nirata ira kasalana.

56 Nadea tau nodawa ala mombanawusaka I'a, tapi tesa ira da'a nosirata samba'a bo samba'a.

57 Pade nekanggoremo bara sakuya mba'a tau ntanina nombabata I'a ante tesa-tesa dawa iwe'i:

58 «Niepe kami tau e'i nanguli, <Aku mombagero Sapu Mpepue e'i to nipowia pale manusia, pade riaru tempo tolumbengi kubangu sapo ntanina anu da'a nikawia pale manusia.> »

59 Tapi tesa-tesa tau etu wo'u da'a nosirata samba'a bo samba'a.

60 Pade nekanggoremo Balengga Topanggeni Agama ri ngayo ira pura-pura nompekutana Yesus iwe'i: «Iwenumo? Naria pesonomu ewa tesa-tesa nu sabi e'i to nanguli Iko atau da'a?»

61 Tapi naupa da'a ria salana, Yesus aga nekalinu. Da'a ria nuapa-nuapa nisonona. Jadi sangganipa Balengga Topanggeni Agama nompekutana I'a, «Ulimo ka kami, Ikomo Magau to Mompakasalama, Ana nu Alatala to Nibila?»

62 Nesonomo Yesus, «Akumo I'a. Pade komi pura-pura kana manggita Aku, Ana nu Manusia mekatoko ri sabingga nggana nu Alatala to Nakuasana. Pade komi kana manggita Aku mana'u riaru kulimu nggari langi.»

63 Nangepe etu Balengga Topanggeni Agama nombaseri pakeana tandaina narau mpu'u rarana, pade niulina ka Topolibu Bete, «Rapokuya kita mangelo sabi-sabi ntanina?

64 Niepe komi mbotomo tesana nompakakedi Alatala! Iwenu pombarata komi?»

Nesonomo ira pura-pura, «I'a kana rasuku mamate!»

65 Pade nompamulamo bara sakuya mba'a tau nantailu I'a. Pade ira nombatondo lenje Yesus pade nombajaguru I'a ante nanguli, «E, Nabi, ulimo sema nombajaguru Iko!» Pade topojaga-topojaga wo'u nombaboba I'a.

Petrus nombasapu Yesus

Mat. 26:69-75; Luk. 22:56-62; Yoh. 18:15-18, 25-27

66 Tempona etu Petrus danaria ri lalowo sapo etu. Naratamo samba'a besi batua Balengga Topanggeni Agama.

67 Tempo i'a nanggita Petrus nekatoko noneru ri setu i'a nombalele mata lenje i Petrus pade niulina ka i'a, «Komi wo'u samba'a tau nosangani-nggani ante Yesus to Nazaret etu!»

68 Tapi Petrus nesapu. Niulina, «Da'a! Da'a ninjaniku patuju tesamu!» Pade nesuwumo i'a mpaka ri tambale ri ngayo nu sapo etu. [Pade nora'omo manu.]

69 Tempo Petrus ri setu i'a nikita besi batua etu wo'umo. Pade niuli besi etu ka tau-tau ntanina ri setu, «Tau e'i wo'u samba'a roana.»

70 Tapi sangganipa i Petrus nesapu.

Da'a nasae nggari setu nanguli wo'umo tau-tau to nengore ri setu ka Petrus, «Natantum komi e'i samba'a roana, sabana komi wo'u samba'a to Galilea!»

71 Tapi nompamulamo Petrus netunda bo nojanji. Niulina, «Mpu'u-mpu'u da'a ntoto ninjaniku tau to niuli komi etu!»

72 Iwetu Petrus notesa nora'omo manu karongganina. Pade natetoramora i Petrus tesa Yesus ka i'a pangane to nanguli, «Da'apa magana ronggani manu mora'o, tolungganimo iko mombasapu Aku.» Pade nageomo i'a nakanjodu-njodu.

15

Yesus nikenri ri ngayo Gubernur Pilatus

Mat. 27:1-2, 11-14; Luk. 23:1-5; Yoh. 18:28-38

1 Dakampadondo njiina balengga-balengga topanggeni agama, totu'a-totu'a nto Yahudi bo guru-guru agama nosangani-nggani ante pura-pura Topolibu Bete Agama ntanina nosaongu patujumo. Ira nombaso'o Yesus pade nanggeni I'a mpaka ri ngayo Gubernur Pilatus. Ri setu Yesus niwai ira ka Pilatus.

2 Pade nekutanamo Pilatus ka Yesus, «Komimo Magau nto Yahudi?»

Nesonomo Yesus, «Ewa to niuli komi etu, Uma, nakono.»

3 Naopu etu nadea mpu'u tesa-tesa pebata to nitesa balengga-balengga topanggeni

agama ka Yesus.

4 Nangepe etu nekutana wo'umo Pilatus ka Yesus, «Iwenumo? Naria pesonomu ewa tesa-tesa pebata e'i? Epemo, nadea mpu'u tesa pebata ira ri ja'imu.»

5 Tapi Yesus da'a ntoto nesono nau aga sambela sampe nasumara mpu'u Pilatus.

Yesus nitangara kana rapatesi

Mat. 27:15-26; Luk. 23:13-25; Yoh. 18:39-19:16

6 Najadi kabiasaanamo butu-butu mpae tempo Eo Bete Paska Gubernur nombakabasaka samba'a tau to nitarunggu nantuki pomperapi ntau dea.

7 Tempona etu naria samba'a tau to nitarunggu nosanga ka i Barabas. I'a nitarunggu mpasangani-nggani ante bara sakuya mba'a tau to nepatesi tempo nangewa pomarenta.

8 Jadi naratamo tau dea ri ja'i Pilatus nerapi ala i'a manggabasaka ka ira samba'a tau nitarunggu ewa to nipowiana butu-butu mpae.

9 Nangepe pomperapi ira nekutanaamo Pilatus ka ira, «Rapokono komi ane aku manggabasaka ka komi Magau nto Yahudi?»

10 Niulina iwetu sabana ninjaninamo balengga-balengga topanggeni agama nanggeni Yesus ri ja'ina sabana naju'a rara ira.

11 Tapi balengga-balengga topanggeni agama nompakapane rara ntau dea ala merapi i Barabasmu to rakabasaka ka ira.

12 Pade nekutana wo'umo Pilatus ka ira, «Ane iwetu, nuapa to masipato kupowia ri ja'i ntau to niuli komi Magau nto Yahudi e'i?»

13 Nongare wo'umo ira, «Pakumo I'a ri kayu parika!»

14 Pade nekutana wo'umo Pilatus ka ira, «Nokuya? Kaja'ana nuapa ntoto to nipowiana?» Tapi ira aga nantambai nongare ante suara to neliu nggamangga, «Pakumo I'a ri kayu parika!»

15 Dota Pilatus mompakadamba rara ntau dea. Sabana etu i'a nanggabasaka i Barabas ka ira. Pade nipakauna tantarana nombaporo Yesus pade mombapaku I'a ri kayu parika.

Yesus nipongei-ngei tantara-tantara

Mat. 27:27-31; Yoh. 19:2-3

16 Pade Yesus nikeni tantara-tantara mpaka riaru sapo Gubernur, etumo ri tombi mpotangara. Pade nipokio ira pura-pura roa ira nasiromu.

17 Ri setu ira nompapasua ka Yesus baju nakamumu ewa to nipake magau, pade nipowia ira wo'u songgo nggari karui nipoposonggo ka Yesus.

18 Pade nompamulamo ira nompongei-ngei I'a ante nanguli, «Ratoiyata Magau nto Yahudi!»

19 Naopu etu ira tunggai nombaboba balenggana ante sampeka wolo pade ira tunggai nantailu I'a. Naopu etu nekadedemo ira ri ngayona ante nongei-ngei mombasomba I'a.

20 Naopupa ira nompongei-ngei I'a iwetu, niwonju iramo baju nakamumu etu pade nipopasua bali ka I'a pakeana mboto. Pade I'a nikeni ira mpaka ri sawaliku ngata ala rapaku ri kayu parika.

Yesus nipaku ri kayu parika

Mat. 27:32-44; Luk. 23:26, 33-43; Yoh. 19:17-24

21 Tempona etu noliumo samba'a tau nosanga ka i Simon tau nggari ngata Kirene, uma Aleksander bo i Rufus, to dako narata nggari sawaliku ngata. I'a etu nipasu'u tantara-tantara manjumbuaka kayu pomparika Yesus.

22 Pade napolamo ira sampe narata ri peto'o to nosanga ka Golgota, batuana «Peto'o Wuku Balengga.»

23 Pade ira nombawai ka Yesus ue anggur nigalo ante pakuli to niuli mur, tapi ue anggur etu nipoarana.

24 Pade ri setumo ira nombapaku I'a ri kayu parika. Naopu etu nibagi-bagi iramo pakeana ante nompemua nowia nomorala mompakatantu bagia ira samba'a bo samba'a.

25 Tempo Yesus nipaku ira ri kayu parika, kira-kira tinti sasio mpadondona.

26 Ri kayu parikana naria nitulisi tesa pombabata I'a iwe'i: E'IMO MAGAU NTO YAHUDI.
 27 Naria wo'u romba'a parampo nipaku ri kayu parika ntanina mpasanggani-nggani ante
 Yesus, samba'a ri pangganana pade samba'a ri panggeina. [
 28 Ante iwetu nadupamo tesa to nitulisi riara Buku Nagasa to nanguli, «I'a nireke samba'a
 nggari tatongo tau-tau naja'a.»]²⁰

29 Tau-tau to noliu ri setu nanguli sinja'i I'a pade nombawiri mata ka I'a. Niuli ira, «E,
 niulimu Iko mamala mombagero Sapo Mpepue pade mombabanguna mpanjili riara tolu eo.
 30 Ane iwetu, pakasalama koromu mboto! Pana'umo nggari kayu parika etu!»

31 Iwetu wo'u balengga-balengga topanggeni agama bo guru-guru agama nompongei-ngei
 I'a. Nangulimo ira samba'a ka roana, «Tau ntanina nipakasalamana. Tapi kita we'i! Korona
 mboto da'a namala nipakasalamana!

32 Ane I'a mpu'u-mpu'u Magau nto Israel, etumo Magau to Mompakasalama, agina I'a
 mana'u nggari kayu parika ala kita manggita pade momparasaya I'a!»
 Pade tau to romba'ana to nipaku ri kayu parika ri sinjori Yesus etu wo'u nanguli sinja'i I'a.

Kamate Yesus

Mat. 27:45-56; Luk. 23:44-49; Yoh. 19:28-30

33 Nompamula nggari katongo nu eo narumaumo eo ri njumaongu tana etu sampe ri tinti
 toluongu ngguwiana.

34 Pade ri tinti toluongu ngguwiana etu, nongaremo Yesus ante suara namangga, «*Eloi,
 Eloi, lama sabakhtani?*» Batuana, «Alatalaku, Alatalaku, nokuya Komi nompalasi Aku?»

35 Sangga nangepe etu nangulimo bara sakuya mba'a tau ri setu, «Epemo! I'a nompokio
 nabi Elia!»

36 Pade nangowamo samba'a nggari tatongo ira nanggeni sangele wunga to nasimbayu
 ewa lumu, pade nibanggana riara anggur to napoina. Naopu etu niumpuna ante wolo pade
 nipopoinuna ka Yesus. Niulina, «Rapoepata sampalai ala manggita ane nabi Elia marata
 mombata'uraka I'a nggari kayu parika!»

37 Naopu etu nongare wo'umo Yesus ante suara namangga, pade nalaimo nosana.

38 Tempona etu wo'u naseri ntongomo kae powombo ri Sapo Mpepue nggari ba'ana narata
 ri wayona.

39 Tempo balengga tantara to nenggore nosintingayo ka I'a nanggita kamate Yesus iwetu,
 nangulimo i'a, «Mpu'u-mpu'u tau e'i Ana nu Alatala!»

40 Ri setu naria wo'u bara sakuya mba'a besi nenggore neantoaka nggawao. Ri tatongo ira
 naria i Maria Magdalena, i Salome, pade i Maria indo Yakobus muda bo Yoses.

41 Iramo besi-besi to nantuki pade nantulungi Yesus tempo I'a ri Bagia Galilea. Pade naria
 wo'u ri setu nadea besi ntanina to narata ri ngata Yerusalem nosanggani-nggani ante I'a.

Yesus nitana

Mat. 27:57-61; Luk. 23:50-56; Yoh. 19:38-42

42 Eo etu eo mpompakasadia ka Eo Mpenonto, damo sambengipa mawela Eo Mpenonto.
 Tempo nora nasolomo eo

43 naratamo samba'a tau nosanga ka Yusuf, tau nggari ngata Arimatea. I'a samba'a
 nggari Polibu Bete Agama nto Yahudi to nibila ntau dea, pade i'a wo'u nompopea tempo
 Alatala mompamula moparenta ri dunia. I'a netibia nalau nantingayo Pilatus nerapi
 watabaku Yesus.

44 Pilatus nakandodo nangepe Yesus namatemo. Jadi nipokiona balengga tantara pade
 nipekutanana, «Iwenumo? Nakono mpu'u Yesus namatemo?»

45 Sangga niepenapa pantesa nggari ja'i balengga tantara to nanguli Yesus namatemo,
 nipaloganamo Yusuf lau mangala watabaku Yesus.

46 Jadi Yusuf nangoli kae gandisi nalusu raposompu, pade nita'urakana watabaku Yesus
 nggari kayu parika pade nisompuna ante kae to niolina etu. Pade nibolina watabaku Yesus
 etu riara dayo to nipa'a ri saongu bulu watu. Naopu etu niluliakana wo'u saongu watu bete

²⁰ Yes. 53:12

nipombapiku pewobo dayo etu.

47 Tempo etu i Maria Magdalena bo i Maria indo Yoses nanggita peto'o nipombaboli watabaku Yesus etu.

16

Yesus natuwu bali

Mat. 28:1-8; Luk. 24:1-12; Yoh. 20:1-10

1 Sangga naliupa Eo Mpenonto nalaumo Maria Magdalena, i Maria indo Yakobus, ante i Salome nangoli rampa-rampa to nawongina rakeni raboli ri watabaku Yesus.

2 Pade dakampadondo njiina ri eo pamulana minggu etu tempo eo dako neonga, nalaumo besi-besi etu mpaka ri dayo Yesus.

3 Ri tatongo jala nosimpekutana ira samba'a bo samba'a, «Isema mamala mombaluliaka watu to nipompiku dayo etu ka kita?»

4 Tapi sangga namosupa ira ri dayo etu nikita ira nakalulimo watu to nabetena mpu'u etu.

5 Pade nesuamo ira riaro dayo. Ri setu nikita ira samba'a kabilasa nobaju bula nekatoko ri sabingga nggana dayo etu. Nanggita etu naeka mpu'umo rara ira.

6 Tapi nangulimo kabilasa etu ka ira, «Ne'e maeka! Ninjaniku komi mangelo Yesus to Nazaret to namate nipaku ri kayu parika. Natuwu balimo I'a, mana ria ri se'i. Kitamo! E'imo peto'o pombaboli watabakuna.

7 Tapi kalaumo komi uli ka anaguruna pade ka i Petrus, «I'a mokolu ka komi mpaka ri Bagia Galilea. Ri setumo komi kana manggita I'a ewa to niulina ka komi bopia.»

8 Jadi nesuwumo ira nggari dayo pade nangowa nalai nggari setu sabana natekaja bo naeka mpu'umo rara ira. Da'a ria ira notesa nuapa-nuapa ka isema-sema sabana naeka rara ira.

Yesus nompopokita korona ka Maria Magdalena bo anaguruna

Mat. 28:9-10, 16-20; Luk. 24:13-49; Yoh. 20:11-23; Suro 1:6-8

[

9 Sangga Yesus natuwu bali nggari kamatena ri mpadondo eo Aka, pamula-mulana I'a nompopokita korona ka i Maria Magdalena, etumo besi to nikabasaka Yesus nggari kuasa pitumba'a seta bopia.

10 Naopu etu nalaumo Maria nombatesa kajadia etu ka roa-roa Yesus to danasusa-susa rara bo nageo-geo.

11 Tapi tempo ira nangepe tesa to nanguli Yesus natuwu bali pade I'a nikita Maria, da'a ntoto niparasaya ira tesa etu.

12 Naopu etu Yesus nompopokita korona wo'umo ka romba'a topantuki I'a ante lenjena ntanina tempo ira nolumako ri sawaliku ngata.

13 Nanggita etu nanjilimo ira romba'a nanteso kajadia etu ka anaguru-anaguruna ntanina. Tapi roa-roa ira etu da'a wo'u nomparasaya tesa etu.

14 Kaopuna Yesus nompopokita korona ka sampulu samba'a anaguruna tempo ira nekatoko nanggoni mpasanggani. I'a nangontiaka ira sabana ira nako'o rara nomparasaya roa ira to nanggita I'a tempo natuwu bali nggari kamatena.

15 Pade niulina ka ira, «Kalaumo komi mpaka ri njumaongu dunia pade patolelemo Kareba Belo ka pura-pura manusia.

16 Isema-sema to momparasaya pade radiu ewa tandaina ira topomparasaya Aku ira kana rapakasalama. Tapi isema-sema da'a momparasaya kana rasuku.

17 Tau-tau to momparasaya kana rawai ka kuasa mompowia tandai-tandai to nipogumaa iwe'i: ira kana mompopalai seta-seta ante kuasa nggari sangaku. Ira kana motesa ante basa-basa to nopo'u nggari ja'i Nosa Nagasa nu Alatala.

18 Ane ira manjoko ule bara manginu panginu to mepakamate, ira da'a mokuya-kuya. Pade ira kana mombadika pale ira ri koro tau-tau naju'a pade tau etu kana mabelo bali.»

Yesus neore mpaka ri suruga

Luk. 24:50-53; Suro 1:9-11

19 Sangga naopupa Yesus notesa iwetu ka ira, neoremo I'a mpaka ri suruga pade

nekatoko ri peto'o to nibila ri panggana nu Alatala.

20 Naopu etu nalaumo anaguru-anaguruna nompatolele Kareba Belo ka tau-tau ri umba-umba, pade Pue mboto nokarajaa mpasanggani ante ira. I'a nombawai ka ira kuasa mowia tandai-tandai to nipogumaa ala mompakaroso tesa to nipatolele ira etu.]

KAOPU NU BUKU MARKUS NTANINA NANTUKI TESA-TESA TO NASAE [

9 Nalaumo besi-besi etu mpaka ri ja'i Petrus ante roana, pade nitesa ira pura-pura to niuli kabilasa etu ka ira.

10 Naopu etu Yesus nompakau anaguru-anaguruna mompatolele ka tau nggari kamataeona sampe ri kasolona Kareba to nagasana to da'a ri kabalina to nantesa katuwua mabelo sampe ri kasae-saena.]